

弘

簡

錄

弘簡錄卷四十八

明刑部員外郎仁和弘齋邵經邦學

皇清翰林院侍講學士四世孫遠平校閱

系屬唐八之一

太祖子璋

孫道宗子孝基

次繪

孫道玄

次禕

子叔良德良幼良孫孝協等

次蔚

子安哲安仕孫琛孝恭瑛瓊

次亮

子神通神符孫道彥孝逸德懋文陳元孫國貞銷昌進說齊物

復若水

世祖

子湛孫博又

高祖子建成

元霸

元吉

嗣曹王

晉孫象

智雲

元景

元昌

元禮

元嘉

子湛誤

靈夔

子道堅

元則

元懿

元軌

鳳

子茂融

元慶

元裕

元名

元祥

元曉

元嬰

太祖八子長南陽公延伯次熊王真從征戰歿無嗣次畢王璋

仕周爲梁州刺史與趙王佑謀殺隋文帝不克死子韶武德初

追封東平郡王孫道宗字承範年十七從起義兵授左千牛備
身封畧陽郡公秦王討劉武周賊怙衆欲戰王與登城望之因
問爾計謂何對曰彼旣席勝宜以計摧難與爭鋒且烏合之衆
最憚持久若堅壁以頓其銳須食盡氣老可不戰禽也王曰而
意正與我合旣而果因糧置夜遁追及介州一戰滅之出爲靈
州總管遇梁師都弟洛仁連突厥兵數萬傳壘閉城拒守伺隙
出戰破之高祖喜謂其勇敢却敵有類魏任城王彭因封任城
王師都引突厥郁射設入居五原至是逐出之震耀威武斥地
千里邊人悅服貞觀元年歷鴻臚大理二卿爲左領軍太宗經
畧突厥復授靈州都督三年轉大同道行軍總管從李靖出塞
親執頡利可汗賜封六百戶還爲刑部尚書吐谷渾寇邊詔與
侯君集副李靖出崑丘道賊聞兵至走嶂山數千里諸將欲止

獨請追窮靖許之。君集不從，乃引偏師倍道兼行，十餘日及之。敵拒險殊死鬪，復引千騎超山後，表裏夾擊，遂大潰。封江夏郡王，授鄂州刺史。久之，以貪穢聞。帝怒曰：「人心無厭，當以誡制。今王廩賜多而貪不止，願不鄙哉。」乃免官削封戶，就第。明年起爲晉州刺史，遷禮部尚書。奏君集必反，帝問何以知。對曰：「君集智小言大，忌而矜功，自破高昌還，耻居人下，官至尚書，鬱鬱不平。帝以其有功材，無不堪，不宜輕度使自猜危。旣而果反，帝笑謂如公素揣將討高麗，道宗請以百騎先往觀，覽山川約二十日還，見天子因秣馬束兵，旁南山入其境，相度夷險，營陣便處將還，遇高麗兵斷路間道，走謁如斯，賜金五十斤，絹千匹，詔與李勣爲前鋒，濟遼水，拔蓋牟城，會救兵大至，與總管張君乂裁領騎四千敵衆十倍，皆欲浚溝保險，以須帝至。道宗曰：「吾爲

前軍當清道以迎乘輿。今賊遠來必疲，我一鼓摧之，必矣。尚何待勤善之選壯騎直突賊陣，左右出入與勦，合擊大破之。帝至，咨美賜奴婢四十口。又攻安市城，築土山，傅城坐失部署，反爲賊據。帝斬其果毅傅伏愛，道宗跣行請罪。帝置不問，以傷足親加砭治，復賜御膳，還以疾辭。劇就閒，改太常卿。永徽初，加授特進，復其封戶，以與無忌。遂良有怨，誣與房遺愛善，流象州。道病薨，年五十四。爲人敬慕，賢士不以地勢凌人。旣晚，好學，與孝恭在宗室中稱爲最賢。子景恒降封廬國公，終相州刺史。弟道興，武德初，爵廣寧郡王，以屬疏降，封縣公。貞觀九年，爲交州都督，卒于官。璋少子孝基，武德初，封永安郡王，歷陝西總管、鴻臚卿。討呂崇茂，詔爲行軍大總管，所隸陝州總管于筠請悉攻城，絕外援，且當有變時，獨孤懷恩，挾異計，紿說孝基，夏城堅攻之。

不易且宋金剛在近不如頓兵待秦王破賊則夏城自孤此謂
不戰而屈人也孝基謂然會尉遲敬德至與崇茂夾攻遂大敗
孝基及筠等皆被執謀亡歸爲賊所害高祖爲發哀優賜其家
招竟以葬贈左衛大將軍諡曰壯無子嗣以兄子道立封高平
郡王例降封縣公終陳州刺史 曾孫涵宋州刺史少康之子
素性忠謹純厚爲宗室雋累授贊善大夫兼侍御史郭子儀表
爲關內鹽池判官肅宗至平涼以畱後杜鴻漸命條具士馬倉
府數目奉牋馳謁敷奏明辨動合事機上悅除左司員外累司
封郎中宗正少卿寶應初河北平遷左庶子兼御史中丞持節
宣慰朔方等軍時方居母喪不得已奪哀赴命所至州縣非公
事未嘗啓口蔬飯木飲席地而臥與居喪無異使還固請終制
代宗見其癯毀許之服除爲給事中遷兵部侍郎朱希彩殺李

懷仙復令宣慰幽冀還爲蘇州刺史充浙西觀察使居五歲入
朝拜御史大夫兼京畿觀察使德宗嗣位以酒和易無所繩舉
除太子少傅充山陵副使檢校工部尚書兼光祿卿未幾轉左
散騎常侍以右僕射致仕累封襄武縣公卒贈太子太保子綱
貞元初爲饒州別駕坐誅

次雅王綰爲隋夏州總管子贊追爵河南王孫道玄性謹厚習
技擊進止都雅武德初封淮陽王年十五授右千牛從秦王擊
宋金剛於介休先登壯之厚加以賞寶建德屯虎牢王輕騎誘
道玄伏以待賊至走之轉戰汜水登南坂貫賊陣出其背
復引還賊皆披靡所發命中王喜給以副騎每赴敵飛矢蜚著
氣益厲東都平爲洛州總管府廢更授刺史劉黑闥再亂命爲
山東道行軍總管與戰下博越濶而馳約史萬寶繼進萬寶素

輕其少年輕敵恐大軍一動必陷泥濘遂不肯前年方十九戰歿萬寶亦爲賊乘舉軍皆潰獨以身免太宗追悼流涕贈右驍衛大將軍諡曰壯無子以弟道明嗣王遷左驍衛大將軍貞觀十四年與武衛將軍慕容寶節送弘化公主於吐谷渾坐漏言主非帝女奪王終鄆州刺史

次郇王祚爲隋上儀同三司生三子長叔良武德初封長平郡王鎮涇州得薛仁果素不卹士值僞內史翟長孫以衆降時遇大饑米斗千錢乃損糧以漁利其下皆怨仁果知之陽言食盡引去遣高塘人詭降叔良遣驃騎劉感率兵赴之至百里細川三烽發仁果自南原大譟而還執感叔良懼悉出金勞軍委事於長孫涇州獲全久之突厥入寇詔率五將軍擊之中流矢道薨贈左翊衛大將軍靈州總管諡曰肅子孝協嗣孝協始王

范陽俄降封郇國公爲魏州刺史麟德中坐賊抵死弟孝斌爲
原州都督府長史生子思訓爲江都令懼武后誅棄官去中宗
復位以耆舊擢宗正卿封隴西郡公歷益州都督府長史開元
初進彭國公加戶二百歷左羽林右武衛二大將軍卒贈秦州
都督陪塋橋陵生平善書世謂小李將軍者弟思誨揚州將軍
子林甫 德良少以疾不任職封新興郡王薨贈涼州都督孫
晉襲封先天中爲雍州長史治有威名坐豫太平公主謀被誅
改氏屬時僚吏解散唯司功參軍李撝哭尸盡哀姚崇擢爲尚
書郎至澤州刺史 幼良封長樂郡王性暴惡高祖數戒不悛
後因擅殺盜馬者帝怒詔李綱集宗室杖之朝堂俄任涼州都
督左右羣聚不逞市里苦之太宗立詔宇文士及往代并按狀
士及露劾復遣孫伏伽鞠視無異辭遂賜死六世孫回

大蔡烈王蔚周朔州總管于安仕安哲安仕任隋右領軍大將
單封趙公武德時例王西平薨謚曰懷四子琛孝恭襄琛字
仲寶本訥少文義寧初封襄武郡公偕鄭元璿持女妓聘突厥
約和親始畢可汗禮之贈遺蕃渥遣骨吐祿特勒隨琛入獻授
刑部侍郎武德初例王襄武郡歷利蒲絳三州總管宋金剛附
滑州突厥多叛詔琛鎮隰州爲政寬簡夏愛便薨子儉襲王
例降爲公 孝恭少沉敏有識量初克京拜左光祿大夫尋除
山南招慰大使徇巴蜀下三十餘州進擊朱粲被俘其衆諸將
請阮之不聽恐阻來者悉放歸農騰傲所致相繼獻款貽年轉
信州總管承制拜假數進破蕭銑策帝嘉納改信爲夔州封趙
郡王大治舟艦習水戰與李靖謀圖江陵收用巴蜀首領并子
弟外示引擢內實質之俄授荆湘道總管統水陸十二軍發夔

陵破銑二鎮所獲戰艦縱之順流以疑沿江州鎮。救兵見者果疑懼不敢進。銑內外阻絕遂降。捷至帝大悅。遷荊州大總管。開置屯田。剗立銅冶。百姓利之。進襄州道行臺左僕射。時嶺表未平。分遣軍使綏州安撫。順附州四十有九。未幾討輔公祏。留爲行軍元帥。引兵趨九江。凡節制李靖。李勣。黃君漢。張鎮周。盧祖尚。諸軍將發。大饗士。杯水變爲血。坐皆失色。孝恭自如。以爲賊臣授首之兆。盡飲方罷。衆心乃安。僞將馮惠亮等拒險。選戰堅壁不出。遣奇兵絕其饑道。賊餓夜薄營。臥而不動。明日遣祖尚選精騎陣以待。旋使羸兵扣壘。佯敗。追北。遇祖尚兵。遂大敗。惠亮退保梁山。孝恭乘勝破別鎮。賊赴水死者數千計。公稱棄丹陽。追騎生禽之。江南平。聖書褒美。賜甲第一區。女樂二部。奴婢七百口。寶玩不貲。進東南道行臺左僕射。行臺廢。更爲揚州大

都督始陷盜賊徧天下太宗身自討定謀臣驍帥金隸麾下無特將專勳者惟孝恭獨有方面功北自淮東包江度嶺而南盡統之性復豪侈欲以威重夸遠俗乃築第石頭城陳廬微自衛後房歌舞百數或誣其謀反召還鑄詰無狀赦爲宗正卿賜實封千二百戶又歷涼州都督晉州刺史貞觀初拜禮部尚書改王河間十四年中飲樂薨年五十帝哭之慟贈司空揚州都督謚曰元陪塋獻陵爲人度量寬恕與人退讓無矜伐色太宗用是親重之宗室莫比十四年與淮安王神通俱加贈陝州大行臺右僕射配享高祖廟庭子崇義嗣降封燕國公歷蒲同二州刺史益州長史有威名終宗正卿次晦軋封中爲營州都督以治狀聞璽書勞賜遷右金吾將軍檢校雍州長史摧摘姦伏無畱隱吏下畏之高宗將幸洛詔晦居守悉委以關中事法令

外苟有利人者行之毋須以聞治績優異武后時遷秋官尚書
卒贈幽州都督子榮奉吳王恪祀 城武德中爲尚書左丞例
王濟北郡終始州刺史瓌始爲郡公進漢陽郡王高祖使持節
遣突厥頡利言和親事可汗始見倨甚瓌開說示以厚幣更大
喜改容加禮因遣使隨入獻名馬後復聘頡利悔前不少屈畱
不遣瓌意象自若亦不爲屈卒以禮遣還遷左武侯將軍代孝
恭爲荊州都督政務清靜士庶懷之嶺外酋豪數相攻遣使諭
以威德皆如約不敢亂後例降爲公長史馮長命者嘗爲御史
大夫素貴事多專決瓌怒杖之坐免起爲宜州刺史終散騎常
侍 安哲爲隋柱國備身將軍追王濟南郡子瑗字德圭武德
時例王廬江郡累遷山東道行臺右僕射討蕭銑無功更爲幽
州都督朝廷以瑗素懦恐不任職輔以王君廓內險賊勇力絕

人瑗倚之寄以心腹會隱太子死與瑗素交結遣崔敦禮召瑗
瑗懼君廓欲乘機陷瑗取爲己功語曰大王爲國懿親受命守
邊而從一使者召乎因泣下瑗信之乃因敦禮勒兵付君廓兵
曹參軍王利涉素知君廓反覆勒瑗收君廓兵用竇建德時山
東失職豪傑今方思亂若能復其舊職厚結以恩隨在所募兵
有不從輒誅之則河北之地可呼吸而有然後遣北燕州刺史
王銑外連突厥由太原南趨蒲絳大王整駕西入關兩軍合勢
不旬月天下定矣君廓密知馳斬銑首徇于軍曰瑗與銑反錮
敕使擅追兵今銑已斬獨瑗在無能爲也能助我者富貴可得
衆咸曰願討賊乃出敦禮于獄瑗聞知率左右數百被甲出君
廓呼曰瑗悖亂賊諸君奈何從之以取駢戮衆反走瑗罵曰小
人賣我君廓卽禽縊之傳首京師廢爲庶人絕屬籍

次鄭孝王亮仕隋爲海州刺史二子長神通少輕俠兵興時在
長安吏逮捕亡命入南山與京師大俠史萬寶河東裴勣柳崇
禮等舉兵爲應連和司竹賊帥何潘仁復合平陽公主徇下鄆
縣自稱關中道行軍總管以萬寶爲副勣爲長史崇禮爲司馬
令狐德棻爲記室唐公聞之甚悅授光祿大夫從平京師擢宗
正卿典兵宿衛封永康郡王俄改淮安武德初拜山東安撫大
使侍郎崔幹副之進敗宇文文化及於魏縣追至聊城化及糧盡
請降幹請納之神通不肯曰師久暴露正當破之以金帛酬戰
士若受其降吾何所藉乎幹曰今建德方至化及未平我轉側
兩賊間王又貪其玉帛敗不日矣神通怒囚幹軍中會士及自
濟北饋軍化及復振神通進兵薄其壘貝州刺史趙君德先登
拔揅神通忌其功復止軍不進君德怒詬而還城復堅守遣兵

走魏州取攻具爲華人所乘引却後二日建德拔聊城勢遂張
山東州縣靡然歸之神通麾下多亡乃退保黎陽依李世勣俄
爲建德所囚建德亡復授河北行臺左僕射從平劉黑闥遷左
武衛大將軍貞觀元年進開府儀同三司賜實封戶五百自以
功高不服上諭之四年薨贈司空謚曰靖子十一遇大封同姓
得王者七道彥膠東考察高密孝同淄川孝慈廣平孝友河間
孝節清河孝義膠西皆郡王太宗時用封德彝言例皆降爵與
孝逸皆爲公孝銳不得封有孫齊物顯道彥幼孝謹隨父亡
命累旬食盡羸服丐于人間採野食以進父未食不敢先卽有
所分辭以飽復藏以待初封義興郡公貞觀初爲相州都督徙
岷州父喪解官苻土就瘞躬時松柏偃廬柴毀親友不復識太
宗嗟嘆敕王珪臨諭服除復拜岷州都督間遣使入党項諭因

威靈區落多降從李靖擊吐谷渾爲赤水道總管厚以利啖党
項使爲鄉導其酋拓拔赤辭詣靖自言往隋無信我資其軍反
見仇剽今幸將軍無他我願聽從相與歃血遣之行至濶水見
赤辭無備遂襲之掠其牛羊諸羗怨卽引兵障野狐峽道彥不
得進遂爲所乘軍大敗死者數萬退保松州詔滅死謫戍久之
召爲媯州都督卒贈禮部尚書 孝逸少好學解屬文始封梁
郡公高宗末歷給事中遷益州大都督府長史素有名望武后
時入爲左衛將軍親遇之討徐敬業拜左玉鈐衛大將軍揚州
行軍大總管師至淮諸將皆以賊壁淮陰騎不得騁僞將韋超
據都梁山士又無所用力欲以偏師綴之用全軍趨揚州度支
使薛克構曰超雖據險然兵少若置不擊無以示威不如擊之
超克則淮陰自震楚諸縣開門迎候賊亦隨授首矣孝逸從之

登山悉擊殺數百人超夜走進擊敬猷淮陰破之敬業回軍下
阿溪引兵直渡大敗之遂拔揚州以功進鎮軍大將軍徙封吳
國公威名益顯武承嗣等忌之以讒下遷施州刺史又誣指逸
字爲走遠兔在月中有天分后信之以嘗有功貸死流儋州卒
景雲初贈金州大都督 孝同孫廣業劍州長史曾孫國貞本
名若幽初任安定扶風錄事叅軍皆稱職軋元中由長安令遷
河南尹避史思明亂率官吏西走陝數月召拜京兆尹上元初
轉成都尹充劍南節度使入爲殿中監二年遷戶部尚書兼御
史大夫持節朔方鎮西北庭興平陳鄭節度行營兵馬充河中
都統處置使賜今名尋又加晉絳慈隰沁等州觀察處置使旣
至歲饑糧乏民貧不忍遽斂軍中譴謗突將王振乘衆怒思得
郭子儀爲帥夜燒牙門左右奔告請避國貞不可遂遇害并殺

二子及三大將爲人清白剛鯁有才辨善用法然峻於操下朝廷卽以子儀代之及至振自謂且見德子儀怒曰汝臨賊境而害主將賊若乘虛是無絳矣又欲冒功乎卽斬以徇詔贈國貞揚州大都督子錡蔭訓鳳翔府參軍貞元初遷宗正少卿自雅王傳歷杭湖二州刺史賂結權倖李齊運遷潤州刺史充浙西觀察諸道鹽鐵轉運使榷酒漕運皆得自專多積財帛歲時進奉以結恩澤德宗甚寵倚之益以利交用事諸臣餘皆侵入國計日耗有浙西布衣崔善貞上書言其不法之罪帝械以賜至則設坎生瘞之天下聞者皆爲切齒錡因得志驕橫無所憚自圖久安之計增置兵額選善射者號挽硬行以隨身雜募雜奚蕃落健兒倚爲腹心厚廩給之咸充假子令爲效用無何改建潤州爲鎮海軍卽以充節度使暴踞日甚屬吏無過輒死又

逼汚良人妻女寮班諫不聽悉遁去憲宗卽位錡不自安假請入覲實無真意詔拜左僕射代以御史大夫李元素遣中使勞問兼撫慰軍士錡稱疾署判官王澹主畱後遷延不行惡澹與中使督趣乘澹視事有所變更輒諷親兵圖之假以給軍士冬服不均殺澹分食之監軍使聞亂遣牙將趙琦慰諭亦櫛食之囚中使別館用其將薛頡主蕃落兵李鈞主挽硬兵公孫玠韓運分總餘軍飾五劍授管內鎮將令殺五州刺史屬別將庾伯良兵三千築石頭城謀據江左常州刺史顏防聞之用其客李雲謀先殺鎮將李深自稱招討副使傳檄蘇杭湖睦四州同討錡湖州辛祕亦殺鎮將趙惟忠獨蘇州李素爲鎮將姚志安執獻於錡敗後亦免上遣淮南王鐔中官薛尚衍發徐汴鄂淮浙江西諸軍自宣杭信三路進討兵尚未集錡以宣州富饒遣四

院隨身兵馬使張子良李奉仙田少卿領兵三千分下宜秋池
既行與錡甥裴行立共謀曰僕射反逆今官兵四集我輩何爲
併與族滅卽夜還趨入城行立舉火內應錡大驚舉族慟哭李
鈞引兵趨山庭院格鬪行立斬之傳首城下子良傳諭城中逆
順且呼錡束身還朝左右縋而出之送于京師自起兵至敗不
數日帝御興安門受之卽日與子師回腰斬于城西南塋以庶
人禮削其屬籍止坐元惡一房貶從弟宋州刺史銛通事舍人
銛於嶺外餘皆赦之孝節曾孫嵩少孤事母孝兄昇弟暉相
與敦友始爲枝江丞張柬之薦之擢衛尉少卿母喪柴瘠訖除
家人未嘗見其言笑開元初授汝州刺史政嚴簡有聲境內肅
然召更太常太僕二少卿遷黃門侍郎檢校太原以北諸軍節
度使革正敝俗尚浮屠棄尸不葬申嚴厲禁人不敢犯久之轉

太常卿旬日拜工部尚書東都留守使吐蕃還稱旨轉兵部遷
太子少傅封武都縣伯爲人風儀秀整莊重清慎方倚爲相無
何卒贈益州大都督 子進亦知名好賔人急從當世賢士游
累擢給事中從廣平王東征爲工部侍郎復署雍王元帥府行
軍司馬遷兵部卒贈禮部尚書 四世孫說字巖甫父遇天寶
時爲御史中丞東畿採訪使說蔭補率府兵曹參軍馬燧辟署
太原少尹遷汾州刺史李自良奏授太子左庶子兼御史中丞
自良卒通王遙領節度大使授說行軍司馬兼知留後中使王
定遠自負扈從有勞頗恣橫請別賜印從之自此監軍始有印
定遠既得志擅補屬吏易置諸將有彭令茵者以久勞不服定
遠怒殺之舉軍皆怒說上其事德宗恕其事令免官定遠僞爲
詔書召麾下皆不至遂自殺說盡斬同謀者擢爲禮部尚書充

河東節度使累封隴西縣男在鎮六年勵精職業築天成軍邊
備積完晚被疾卒年六十一贈尚書右僕射 齊物字道用天
寶中歷懷陝二州刺史開砥柱得古鐵犁鐮存平陸字因吹河
北縣爲平陸加齊物銀青光祿大夫鴻臚卿遷河南尹坐與李
適之善謫竟陵太守入爲司農卿以常辱裴冕改太子賓客歷
刑部尚書鳳翔京兆二尹太子太傅兼宗正卿卒贈太子太師
爲人無學術性苛察喜發人私在官嚴整廉潔吏無敢欺者
子復字初陽以蔭累江陵司錄參軍性苛刻精曉吏道爲長史
衛伯玉所信府中之事多以委之表爲江陵令得士民心遷少
尹歷饒蘇二州刺史母喪解會李希烈叛荆南張伯儀數爲所
窘奪喪除行軍司馬兼御史中丞尋改容州刺史兼本管招討
使凡鹵獲悉訪親戚還之在容三年人賴以安轉嶺南節度使

兼御史大夫時安南經畧高正平張應相繼卒叅佑李元慶胡
懷義等因阻兵齊州縣肆爲姦賊復至誘懷義杖死流元慶荒
裔教民作陶瓦諭蠻獠收瓊州置都督府以綏定其人政理肅
然召拜宗正卿檢校工戶兵三部尚書歷華滑二州刺史在鄭
聖營田庶軍賦不及民衆皆悅之加檢校右僕射卒年五十九
贈司空諡曰昭議者病其頗嗜財利爲世所譏 從父若水爲
左金吾大將軍兼都事舍人爲人多識舊儀容貌瓌偉每宣贊
進退閒華可觀在朝三十年卒 神符少孤事兄盡禮初畱長
安爲衛文昇所囚後封安吉郡公例王襲邑武德四年遷并州
總管頡利可汗盜邊馬戰汾東斬級五百獲馬二千又戰沙河
獲乙利達官得可汗所乘馬及鎧召爲太府卿遷揚州大都督
人賴其利以足不良頗少威嚴下不畏之擢宗正卿改光祿大

夫歸第月給羊酒太宗就問令乘小輿入殿三衛挾輿以升遷
開府儀同三司薨年七十三贈司空荊州都督謚曰恭恪塋獻
陵七子並封郡王例降公惟德懋文陳知名 德懋官至少府
監臨川郡公曾孫模至德中爲荷氏令率衆拒史思明遷黔中
觀察使終太子賓客贈太子太保謚曰敬 模孫從順寶歷初
及第擢累太常博士甘露之禍以李孝本族弟貶朗州司戶遷
亳州司馬久乃轉吏部郎中兼侍御史知雜出爲常州刺史鎮
海節度李琢表其政賜金紫歷京兆尹工部侍郎山南西道節
度使以最就進銀青光祿大夫卒年六十三贈吏部尚書爲人
丰姿偉岸能獎目後進所至以風力聞少與崔龜從李景讓裴
休善又識楊收於布衣時一見如舊咸至公輔 文陳歷幽州
都督魏郡公垂拱中坐累貶滕州別駕死子捷襲封元孫程石

皆見宰輔

世祖四子高祖居末長梁王澄次蜀王湛鄭王洪皆早卒湛子長博又武德初劍封隴西次奉慈渤海皆王後擢特進禮部尚書兄弟皆驕侈不循法度佞妾數百淫於聲樂恒昵小人所爲不軌疎遠墳典高祖鄙之各賜市書絹資冀其愧改終不自克卒贈開府儀同三司荊州都督奉慈原州都督

高祖二十二子竇皇后生建成元霸元吉建成小字毘沙門性弛縱不檢荒色嗜酒耽獵無度所從皆博徒大俠祖初被詔討賊携其家寓居河東兵起與元吉密召赴太原隋人購之急從間道至祖大喜授左領軍大都督封隴西郡公引兵畧定西河從平京師隋恭帝立爲唐國世子開府置官屬歷撫軍大將軍東討元帥將萬人徇洛陽授尚書令受禪立爲皇太子上欲其

習事敕非軍國大務聽裁決之命李綱鄭善果與參謀議武德
二年率將軍桑維和平司竹羣盜祝山海又涼州人安興貴殺
李執以衆降詔趣原州應接時甚暑因不恤事復多亾去稽烏
酋劉企成寇鄜州詔討之斬獲千計官其深畏使還招降羣卒
六千陰勒兵悉殺之企成懼奔衆師都又嘗循行北邊遇賊四
百山降悉馘其耳上以秦王功業日盛有奪嫡之意太子危甚
會劉黑闥復亂宮臣王珪等進說殿下功德素少人罕心服特
以嫡長居要地今黑闥殘孽衆不盈萬唾手可得因往山東結
約英俊以固寵位太子然之請行果敗之于洛水復問魏徵山
東其定乎對曰黑闥雖敗其魁黨皆懸名處死妻子係累欲降
無由雖有赦令衆不肯信若非蕩宥使襁甲各還鄉里恐殘賊
煽結民未可安旣而勢果復振廬江王瑒棄洛州山東大亂太

子從徵言釋其鹵獲縱囚妻子使轉相告衆乃散遂禽黑閼與齊王謀帝晚多內寵張婕妤尹德妃最幸親戚分事官府益結其權而秦王數將兵在外與諸妃希相見及平洛陽諸妃馳謁見府庫服玩私有求索又爲兄弟覓官皆不與反怨之王以淮安王有功給任內田十頃婕妤爲父丐之上手詔以賜神通以有前教不肯與婕妤訴上賜妾父田王奪與人上怒召王讓曰我詔令不如爾教耶他日又謂裴寂兒久典兵爲儒生所誤非復我昔日子適府屬杜如晦過尹妃父門僮奴倚勢責其下馬摔毆折指父反使妃訴王左右榮其父上大怒詰以妃家尚凌之况百姓乎王自辨不聽由是漸疎上嘗內宴王感母后不見悲泣妃乘間語上曰今海內無事陛下春秋又高正當娛侍爲樂何事輒悲正爲與妾輩耳使萬歲後王得志妾復有遺類乎

幸東宮慈愛必能全養言已悲不自勝上爲惻然遂無易太子意突厥入寇上議遷都王苦諫止太子譖以欲假禦冠爲名以久其兵權而謀篡奪上寢不悅秦王居西宮承乾殿齊王居武德殿後院與東宮晝夜往來通謀太子私募四方驍勇并長安惡少二千爲宮甲屯左右長林門號長林兵復令左虞候率可達志募幽州突厥兵三百上知之召太子詰責流達志于尚州華陰楊文幹素凶詖又昵之使爲慶州總管亦遣募兵送京師值上幸仁智宮畱太子居守趙郎將余朱煥校尉橋公山遺文幹甲趣典兵煥等懼至幽鄉白其狀寧州人杜鳳亦上變帝遣司農卿宇文穎驛召文幹文穎者代人自李密所來降爲農圃監封化政郡公性貪與齊王厚善反豫文幹謀遂發兵反帝未忍卽治悉捕官屬托以他事召太子懼不敢往趙弘志勸令損

車服徑入叩頭請死。帝怒囚之。以兵衛守。會文幹陷寧州。與行
宮近。帝驚召秦王問計。對曰。文幹豎子耳。官司當卽禽之。就使
假刻漏之限。一將可辦。帝曰。事連太子。恐患者衆。爾宜自行。還
日立爲太子。使建成王蜀地。不足爲患。必不能事汝。取之易也。
秦王啓行。文幹果爲其下所殺。傳首來降。王執頴還斬之。妃及
元吉內助祁請封德彝外爲遊說。上意復解。仍釋之以兄弟不
容歸罪。王珪韋挺杜淹等謫之遠方。自此猜怨日結。必欲殺王。
謀於夜宴。進毒淮安王拔還王。衄血數升。上臨幸視疾。因語王。
曰。而兄弟終不相下。同在京師。忿鬪且深。爾宜往洛陽行臺。分
陝以東。悉主之。如故事。許建天子旌旗。王泣以不可遠離膝下。
非所願也。上曰。漢陸賈猶遞過諸子。今東西兩京。思汝卽至。何
所悲耶。王將行。建成等復謀所慮正在土地甲兵。今得之必爲。

患若留京師一匹夫耳。密使人上書言秦王左右皆山東人。聞還洛皆喜。觀其意不復來矣。事又寢。九年。密與齊王謀剋期舉事。王知之。因發其淫亂後宮。且欲殺臣與世充。建德復仇。臣死地下。愧見諸賊。帝大驚。報曰。旦日當窮治。汝宜早參。張綖奸馳語建成。亟召元吉。謀勒宮甲。託疾不朝。六月四日。秦王入朝。帝已悉召諸大臣入。二人至臨湖殿。覺變。遽回。秦王隨呼之。元吉惶悚。引弓三射。不能發。王一箭斃建成。再中元吉。敬德追殺之。俄而二府兵三千攻玄武門。閉不得入。接戰久之。矢及殿屋。秦王左右數百騎至。合擊之。衆遂潰。帝語裴寂等曰。事今奈何。蕭瑀陳叔達贊帝曰。秦王功蓋天下。內外歸心。立爲太子。付以軍國。陛下釋重務矣。帝曰。此吾素志。乃召秦王至。慰撫之。王號泣不能止。詔併其子安陸王承道。河東王承德。武安王承訓。汝南

王承明鉅鹿王承義悉誅之除其屬籍太宗立追封息王謚曰
隱以禮改葬令東宮舊臣皆會於宜秋門哭之貞觀十六年追
贈太子元霸字大德幼辨慧年十六卒無子武德初追謚衛
懷王秦州總管加贈司空初封皇子泰宜都王奉其祀泰徙封
更以宗室西平王瓊子保定嗣薨無子國除

元吉小字三胡生時后惡其貌不欲舉侍媼陳善意私乳之及
長猜鷙好兵義師已西留守太原封姑臧郡公進齊國公總十
五郡諸軍事加鎮北將軍太原道行軍元帥許以便宜受禪進
齊王爲并州總管居過久益驕侈常令奴客諸妾數百人被甲
習戰相擊刺死傷甚衆身亦中創善意止之反怒命壯士拉死
私謚慈訓夫人又荒於從禽卽常載且網自隨曰我寧三日不
食不可一日不獵復寅夜潛出民家奸媾府門不敢閉道上射

矢觀人奔避爲樂百姓怨毒朝廷以劉武周畧汾晉遣右衛將軍宇文歆助守歆驟諫不納表言其過不可與共守有詔免官隨諷父老詣闕請留詔乃復職時武周五千騎屯黃蛇嶺元吉遣將軍張達領步卒百人背寇辭以兵少彊遣之達怒導武周陷榆次進逼并州元吉大懼給司馬劉德威以老弱守城吾率銳士拒賊因齎寶物携妻妾夜出委軍奔京師并州陷帝怒自是不復顧委以軍尋授侍中爲稷州刺史襄州道行臺尚書令秦王圖東都寶建德來授王率精騎逆戰畱與屈突通守圍世充易之輒出兵元吉設伏刦之斬首八百級命其將柴仁昉東都平拜司空加授隰州總管賜袞冕服鼓吹二部班劍二十人黃金二千斤與太子秦王各賜一鎰鑄錢尋轉右衛大將軍又進司徒并州大都督常欲謀害秦王後并圖太子乘上避暑太

和宮謀以兵襲取秦王置土窖中惟開一竅以通飲食太子不
忍乃內連嬖幸與張婕妤尹德妃淫亂復與諸公主及六宮親
戚豪占民田宅狗馬同惡相濟掩蔽上聰惟以甘言諛詞候上
顏色苟行已志又多匿亡命厚賜壯士使爲已用其記室榮九
思爲詩刺之弗悟典籤裴宣儼免官往事秦府事泄楊毅之秦
王嘗從帝幸其第伏護軍宇文寶寢內將以刺王太子止之愠
曰吾爲兄計於我何有會北伐突厥多引秦府驍將秦叔寶尉
遲敬德程知節段志玄與同行籍其精兵益隸麾下迺徙玄齡
等不得在府乘間密請害秦王帝謂王有定四海功殺之何名
諺曰昔平東都顧望不西散金帛樹私恩豈非反邪上不應復
與太子謀邀秦王送至昆明池伏壯士拉之立爲皇太弟盡坑
殺叔寶等誰敢不服幸更令王匿密以謀告秦王王計乃決僚

屬皆畏其狼戾莫敢諫止護軍薛寶璣以元吉二字合成唐字
諂之卽大喜曰但除秦王取東宮如反掌耳其傾謀如此死年
僅二十四太子三十八子五承業梁郡王承鸞漁陽王承獎普
安王承裕江夏王承度義陽王玕伏誅貞觀初改葬追爵海陵
神王謚曰刺後改封巢太宗卽位納其妃寵之欲立爲后魏徵
諫曰陛下不可以辰嬴自累乃止生子卽曹王明立爲嗣明
貞觀二十一年始封顯慶中授梁州都督歷號蔡蘇三州刺史
永隆中坐庶人賢累降王零陵徙黔州都督謝祐希古逼殺之
高宗悼甚官吏皆坐免景雲中陪葬昭陵三子長俊嗣王爲南
州別駕次傑黎國公垂拱時與備俱竄神龍初以傑子胤嗣曹
王會備自嶺外還時諸王子孫壯者已誅死幼皆沒爲官奴或
聖人問庸保至是相繼出入見中宗皆號慟帝爲泣下隨屬遠

近封拜。詔停胤而封備歷衛尉少卿。薨。開元十二年復封胤。薨。子戢嗣位左衛率府中郎將。天寶十一載薨。子臯嗣。臯字子蘭。少補左司禦兵曹參軍事。母鄭太妃以孝聞。嘗坐事懼憂。其母出則因服入。乃衣冠言貌如平常。遭亂問道走蜀。由都水使者遷左領軍將軍。上元初請外補溫州長史。俄攝州事。歲饑。不待請賑。以官廩優詔開許。就進少府監。時侍御史李鈞與弟法曹參軍鏐俱以文藝登科宦遊二十年不還鄉。其母窮老不自給。因行縣見之。劾罷除名。召還。上書言治道授衡州刺史。坐侵觀察使辛京杲被劾貶潮州。楊炎知其直。卽復其任。建中元年遷湖南觀察使。值京杲貪虐。刑部將王國良家富。使戍武岡。誣坐以死。國良恐遂據縣反。再歲討之。不能下。臯至。遺書曰。某與將軍皆被讒誣。今汝亦非謀逆。特恐僥畏死爾。旣遇我。可明心。

勇傳
不然我以陣衝破將軍陣以攻法非將軍城非人所能度也
國良得書喜且懼因請降然內尚首鼠舉卽自稱使者舉驍造
其壘賊延入大呼曰有識曹王者乎今在此一軍愕眙不敢動
國良迎拜叩頭請罪執手約爲兄弟於是盡焚攻具悉散其兵
有詔赦之賜名惟新居母喪會果崇義反起復左衛大將軍復
還湖南尋加散騎常侍討李希烈還江西節度使兼御史大夫
受命卽行至豫章令將吏有功未中與懷罷不發者皆自言得
裨校伊慎季伯潛劉旻悉補大將擢王鏐爲中軍以馬繁許孟
容爲賓佐治戰艦哀兵二萬委慎等演藝教以秦兵團力法聯
其賞罰弛張如一初慎嘗從希烈平襄州至是懼爲舉用卽縱
反間德宗信之以舉請令自效敕勿誅免以立功賜所乘馬及
鎧仗使將先鋒斬賊數百級賊柵蔡山不可攻舉聲言西取斬

引兵繼循南涯沂江而上賊聞以羸師保柵悉軍行江北度去
蔡山遠亟令步士登舟順流而下攻拔蔡山賊還救已敗因取
蘄州降其將李良平黃州兵益振元帥舒王授以前軍兵馬使
俄而駕幸奉天希烈使杜少誠引步騎將絕江舉遣慎引兵七
千禦於永安走之以功進工部尚書加銀青階上方蒙塵貢獻
相望不敢居城府出屯西塞山大洲徙近縣爲軍市商貨畢至
駕遷改戶部尚書又遣慎鏐攻安州未下希烈使劉戒虛以步
騎八千來援復命伯潛迎擊捷於應山遂下安州斬僞刺史王
嘉祥希烈別遣兵援隋州臯破之虜鄉因下平靜白鴈等關賊
遂不敢南畧貞元初遷荆南節度使凡戰大小三十二取州五
縣二十斬首三萬三千生禽萬六千未嘗敗北師所過不敢伐
桑棗踐禾稼朝廷仰食江淮道出九江至大別皆與賊接賴以

轉戰數千里餉路遂通江漢倚阜爲固淮西平請護喪歸東都
遣中人賜弔贈父右僕射母曹國太妃訖楚來朝還就鎮築江
陵東北傍漢古堤得良田五千頃規江南廢洲爲廬舍構二橋
跨江以居流人山荆抵樂鄉二百里間皆不井飲亦命鑿治以
便人汲貞元初吳少誠擅蔡徙鎮山南東道割隋汝以隸練兵
時糧市回鶻馬以益戰騎大行蒐狩少誠畏之素性勤儉能知
人疾苦參聽微隱盡得吏下短長其賞罰必信所至常平物估
豪右不得擅其利兼有巧思戰艦下挾二輪鼓水疾進駛于陣
馬有所造作皆用省而利長又自創意爲欬器以槩木上出五
觔下銳圓爲孟形所容二豆少則弱多則強中則力均雖動搖
不覆進入內中每遣人以物必自視衡量庫帛皆印署以杜吏
謾彝扶風人初未知名舉識之卒以正直稱嘗宴集張東之喪

陽故園將市取之彛謂漢陽有中興功今遺業當百世其保柰
何使其子孫嚮平謝以微君不聞此言主吏失詞以爲君羞年
六十卒贈尚書右僕射謚曰誠子二 長象古元和中自衡州
刺史擢安南都護貪縱不法忌蠻酋驪州刺史楊清世代豪強
召爲牙門將常鬱鬱思亂會計邕管黃家叛賊詔發兵助戰象
古授清兵三千還與子志烈及所親杜士交廻戈襲安南殺象
古妻子支黨皆盡詔赦清爲瓊州刺史以桂仲武爲都護且招
諭之清據城不納人無聊生仲武分諭渠酋數月間歸附繼至
約兵七千餘人破其城斬清送夷其族 次道古登進士擢校
書郎集賢學士累遷司門員外郎歷利隋唐睦四州刺史黔中
觀察使代柳公綽爲鄂岳沔斬安黃團練觀察使倍道而入公
綽惶遽出資財皆被擄奪元和十三年攻申州破其郭進圍中

城守卒夜驅婦女佯譟城上潛發懸門以出道古衆亂多死于賊素以給軍錢沒已併奉權倖又誣逐李聽守安州無功自將出木陵關士卒怨怒不爲盡力卒以無功明年召爲宗正卿自以在郢貪黷恐終得罪乃薦山人柳泌以媚於上轉左金吾將軍終致大禍穆宗立貶循州司馬終以服丹餌啗血而死長慶初詔還其官生平便佞巧宦早昇朝籍常以酒肴恭博游公卿間所賄僞爲不勝厚進所饋嗜利者多得其懼心故能盜美名及死賣宅以塋

萬貴妃生智雲初名雅詮善射工書奕起兵時寓家河東吏捕送長安爲陰世師所害年十四武德元年追封楚王贈涼州總管加司徒謚曰哀妃性恭順高祖甚禮之宮中事成以咨決三年立太宗子寬爲嗣早夭貞觀二年復以濟南公世都子靈龜

嗣永徽中歷魏州刺史爲政成嚴盜賊不敢發鑿永濟渠通新市百姓利之先妃閻氏繼妃上官氏秦州上邽人右金吾將軍懷仁之女有賢行事本生舅姑恭謹彌甚凡有珍味非經獻不敢先嘗薨日前妃無近族議欲不舉謝以孤寡無依備禮合葬聞者嘉嘆喪除兄弟以妃年少無子欲議改醮封曰丈夫以義烈標名婦人以操守顯節寧先填溝壑豈復御粧飾往他門乎卽引刀自誓遂不敢強卒于福嗣降爲公卒子承況嗣神龍中爲右羽林將軍死節愍太子之難

莫嬪生元景武德三年與魯鄆同封趙王貞觀初累遷雍州牧再徙王荆領荊州都督徙鄴州永徽初進位司徒子則與吳王坐房遺愛繫獄高宗欲句二人死以崔敦禮不可賜死久之追封沈黎王以渤海王承慈子長沙嗣降爲侯神龍初復王爵以

孫元遜嗣薨無子國除

孫嬪生元昌初王魯貞觀五年授華州刺史轉梁州都督十年改封漢爲人有勇力善騎射數觸軌愆上手詔誨督不能改反怨望附太子逆謀見帝側美人善琵琶請于承乾異日事成幸賜我承乾許之事敗帝弗忍誅高士廉李勣等固爭乃賜死國除尹德妃生鄧悼王元亨張氏生周王元方皆早薨

郭婕妤生元禮性恭謹善騎射武德四年封鄭王授鄴州刺史貞觀六年徙王徐遷徐州都督十七年轉絳州刺史有警政璽書勞勲永徽中加司徒兼潞州刺史薨贈太尉冀州大都督諡曰康子茂封淮南王險薄無行道蒸父妾事洩流死振州神龍初子瓘嗣開元中爲宗正卿薨子延年嗣李林甫劾其女嫁外國貶文安郡別駕終餘杭司馬永泰初子諷爲施州刺史其婿

黔中觀察使趙國珍言諸朝詔以嗣王

宇文昭儀生元嘉母卽宇文述女早承寵愛禪位時欲立爲后
固辭王因母寵愛踰諸子武德四年封宋王改王徐貞觀六年
授潞州刺史時年十五有至性聞母病涕泣不食居喪毀甚太
宗數加慰勉自少好學藏書至萬卷皆以古文字參定同異與
同母弟靈夔友愛燕見終日如布衣禮閨門修整當世稱之貞
觀九年擢右領軍大將軍十年收封韓遷滑州都督高宗末爲
澤州刺史武后臨朝外示尊寵進太尉連徙定絳二州后疑宗
室不附已將圖之元嘉大懼與子譔糾合宗室將謀舉義遣使
告諸王曰太后召宗室朝明堂大享後必盡誅宗室李氏將無
種不如先事而起乃矯爲中宗璽書督諸王發兵倉卒皆不至
元嘉至京師逼令自殺年七十六子訓潁川王早卒諡武陵王

官至濮州刺史諡上黨公通音律歷杭州別駕諡黃公工辭章
孟利貞稱其文勝於劉麟之周思茂家多藏書皆文句詳正秘
府所不及方任通州刺史辭疾歸謀起兵與諶俱死神龍初凡
被禍者咸復爵土以第五子訥嗣官至祭酒卒子叔璩嗣歷國
子司業卒子煒嗣建中中改王郾後懿宗以郾王卽位復改嗣
韓

靈夔少有美譽篤學善草隸通音律貞觀五年封魏王改封燕
魯歷幽州都督亮隆絳滑定五州刺史加太子太師垂拱元年
徙相州坐謀起兵流振州自殺長子詵清河王早夭次子藹范
陽王知越必敗自發其謀得不誅歷右散騎常侍爲酷吏所害
子道堅嗣王性方嚴有禮法造次必於莊敬閨門肅如少年
佐郡聲實已彰景龍四年加銀青光祿大夫歷果隴吉莫洛汾

滄七州刺史遷國子祭酒開元中選授汴州刺史河南道採訪使以清毅稱入爲宗正卿卒贈禮部尚書子宇嗣從玄宗幸蜀爲右金吾將軍寶應初以皇太子封魯更封鄒王弟道遠封戴國公恭默自守數任清職終尚書右丞

王才人生元則字彝武德四年封荆王貞觀七年授婺州刺史十年改王彭爲遂州都督以冠服奢僭免乃更折節厲行轉澧州刺史頗著聲譽遷贈司徒荆州大都督諡曰思高宗登望春宮過其喪無子以霍王子絢嗣龍朔中封南昌王薨子志陳嗣開元中爲宗正卿

張寶林生元懿與元則同封滕王同出爲兖州刺史同改王鄭歷鄭潞絳三州刺史以嘗好學喜經術數斷大獄甚有平允之望高宗嘉之璽書褒錫薨贈司徒荆州大都督諡曰惠十子璲

嗣王終鄂州刺史子希言嗣開元中爲右金吾大將軍遷太子
詹事弟察言生二子自仙爲楚州別駕生夷簡嗣爲宗正卿歷
華州刺史鎮國軍潼關防禦使封陳留郡公生宗閔弟琳安德
郡公生擇言擇言生勉三人皆位宰相時稱忠鄭王後以別鄭
王亮云

張美人生元軌武德六年與幽漢同封蜀王改王吳爲人多材
藝高祖太宗皆寵重之嘗問魏徵以子弟孰賢對曰臣愚不能
盡知惟吳王數與臣言未嘗不自失又問與前代孰比對曰經
學文雅雖若河間東平至孝行曾閔不能過由是寵過益厚詔
納徵女爲妃嘗從獵遇羣豕皆不虛發帝撫其背曰顧今無所
施方天下未定若射豈可多得貞觀七年授壽州刺史居祖喪
哀毀過情服除菜食布衣終其身至忌口輒累盤不食十年徙

王霍歷絳徐定三州刺史所至閉閣讀書禮賢愛善以吏事委
長史司馬謙慎自將未嘗忤物數引見處士劉玄平爲布衣交
或問王所長答曰無長問者不解玄平曰人有短所以見長若
王無所不備吾何以稱之突厥來寇令開城門偃旗幟果疑不
敢進有詔窮究州人李嘉運潛謀結賊恐人心愈搖但殺嘉運
餘無所問自刻違詔帝喜曰朕固悔之非王之明幾至於失定
州民王文操與賊戰敗二子鳳賢以身蔽偕死父獨得全遣使
弔祭上聞贈以朝散大夫旌表其閭來朝上疏數陳得失多所
裨益國有大事密制咨逮帝勿與侍中劉齊賢同知山陵事服
其淹練故事歎非所及嘗遣國令督封租請貿易取贏答以當
正吾失反啓吾利不納俄進司徒出爲襄青二州刺史坐與千
緒謀起廢徙黔州至陳倉薨六子緒江都純安定皆王餘爵皆

公緒有才藝聲譽彰聞爲金州刺史被誅神龍初金復官爵以
孫暉嗣王開元中爲左千牛將軍

楊美人生鳳字秀成始王幽刺鄧州徙王號歷刺號豫齊三州
素喜畋游過官屬不以禮楚贈司徒揚州大都督諡曰莊七子
長翼嗣王終光州刺史子馮嗣無傳次茂融以勇聞番拱中爲
申州刺史越王倚以爲助及得書倉卒不能應僚屬勸以自聞
得擢太子右贊善大夫其黨引之復誅中宗立以鳳孫邕嗣王
娶韋后妹累遷秘書監知隴右三使歷仗內諸廐徙王汴復敗
自殺至子巨復爵還戶 巨剛銳果決畧通書史好屬辭天寶
五載出爲西河太守坐資給柳勣支黨貶義陽司馬又坐與史
敬忠善安置南賓郡起爲夔陵太守祿山反張垠薦其善騎射
有謀畧可屬大事召至京師楊國忠忌之謂曰比來人多口打

賊君不爾乎。巨曰：誰爲相公手打賊者？除爲譙郡太守、攝御史大夫、河南節度使，與朝廷析契爲驗。凡聘召用以取信，以防姦詐。俄兼統嶺南、何履光黔中、趙國珍南陽、魯炆三節度兵至內鄉，賊將聿思琛解圍走京師，平拜爲留守兼御史大夫。明年進太子少師兼河南尹，東畿採訪使妃卽張皇后從妹，與之不睦，自引捕博少年招貨撓政，素私宗正卿李遵發。巨賊事貶道州刺史，會段子璋反，倉卒迎謁被殺。子則之嗜書，年五十餘尚執經太學，嗣曹王臯薦之爲睦王府長史。貞元二年遷左金吾衛大將軍，與從甥竇申謫陸贄貶昭州司馬。

劉凝好生，元慶始王漢後徙陳貞觀十年，復王道歷趙豫滑三州刺史，以治績聞。高宗下詔褒賜，又更徐沁衛三州事，母恭謹喪塋躬修墳墓，贈司徒、益州都督，謚曰孝子，誘嗣王臨淮爲

澧州刺史坐賊削爵更以次子詢之子微嗣堯子鍊嗣父子皆至宗正卿

崔嬪生元祿貞觀五年始王郁十一年徙王鄧皆與譙魏許密同封爲人好學善談名理與典籤盧照隣爲布衣交歷鄧梁黃壽襄五州刺史遷兖州都督堯贈司徒益州大都督諡曰康無子以弟江王子廣平公炅嗣堯子孝先嗣開元中爲冠軍大將軍

小楊嬪生元名始王譙後徙王舒歷壽滑許鄭石五州刺史自幼矜嚴長而高潔能疏財未嘗問家人產業居常以禮自將門庭清肅常戒其子豫章王亶曰所乏不患無財患無德行但勉行善事忠孝持身此吾志也及亶爲江州刺史有美政高宗手詔褒美義方之訓欲授元名大州辭曰臣忝屬籍豈以州郡爲

仕進資耶不受治州二十年數游山林有高蹈之意番拱中徙
鄭州境接東畿諸王貴戚縱暴百姓至則盡革之以廉威著名
進加司空武后時爲丘神勣構死神龍初詔復官爵贈司徒孫
津嗣開元中爲左威衛將軍薨子萬嗣薨子藻嗣

楊嬪生元祥始王許後徙王江歷蘇金鄜鄭四州刺史性庸鄙
所至營求無厭其人魁大帶十圍食兼數人薨贈司徒并州大
都督謚曰安七子暉永嘉王以禽獸行誅收武陽王餘爵皆公
中宗立以孫欽嗣倬繼宗嗣皎降禮國公

魯才人生元曉貞觀五年封密王歷號澤宣徐四州刺史亦稱
貪暴無善政薨贈司徒揚州都督謚曰貞子穎嗣爲南安王薨
子昉嗣神龍初穎弟亮養子曇嗣開元五年更詔再從東莞郡
公徹嗣徙封濮陽郡王歷宗正卿金紫光祿大夫

柳寶林生元嬰貞觀十三年封滕王授金州刺史爲人驕縱失
度居太宗喪燕飲歌舞城門不閉高宗切責久之遷洪州都督
坐法削戶謫置滁州起授壽州刺史徙隆州帝以錄事參軍裴
聿嘗諫正其失遷爲六品上階又賜諸王綵幣以元嬰及蔣王
食黯但給麻二車助爲錢緡二王大慙武后時進開府儀同三
司梁州都督薨贈司徒冀州都督以上諸王除罪死伏辜皆陪
塋獻陵六子長修琦嗣爲長樂王餘爵皆公垂拱中多死詔獄
神龍初更以修信子涉嗣開元中授左驍衛將軍薨子湛然嗣
從玄宗至蜀擢左金吾將軍

文宗子永 武宗子峻 暉 嵯 宣宗子漢 滋

懿宗子保 倚 僖宗子震 陞 昭宗子裕等

太宗十四子文德皇后生承乾與泰以生承乾殿字曰高明武德三年封常山郡王俄徙中山八歲立爲皇太子性特敏惠帝愛之方居諒闇使裁決庶政有大體後每行幸特令監國及長好聲色漫游懼帝知秘其迹臨朝視事言必忠孝退乃與羣不逞狎宮臣諫者輒斂容自咎以智飾非文過初以爲賢上每厚賜孔穎達令狐德棻于志寧張元素趙弘智王仁表崔知機等欲以厲其心然性傲不悅過惡彰聞素有足疾行步艱難而魏王泰有時譽各樹黨與遂成讐隙會有俳兒善姿首太子雙愛名曰稱心帝怒殺之意爲泰所告遣人陰圖害之復念不已爲築室圖像而祭樹碑起塚朝夕泣涕自此稱疾不朝使戶奴數

十百人。學蕃人語音。椎髻跳舞。鼓鞀之聲。晝夜不絕。還貌類蕃者。被裘辮髮。造五狼頭。蠶設穹廬。自居。效其食飲。抽刀割肉。自身作可汗死。衆號哭。驚而忽復起曰。異日有天下。將數萬騎。到金城。解髮委身。得當一設。顧不快耶。左右以爲妖。又毀甌爲鎧。列丹轍。勒部陣。與漢王元昌分統。大呼擊刺爲樂。不用命者殺之。餘下腐刑。云異日得位。有敢諫不肆吾欲者。效此。厚賞壯士。左衛副率甘師進刺客張師政。紇干承基等謀殺宮臣不克。尋與元昌侯君集。李安儼。趙節。杜荷。鐵。啞。管。血。謀以兵入西宮。貞觀十七年。值齊王祐反。因召承基等語。以我宮西牆去大內僅二十步。不與齊州等會。承基連齊王事。當死。卽上變告詔長孫無忌。房玄齡。蕭瑀。李勣。孫伏伽。岑文本。馬周。褚遂良。雜治廢爲庶人。徙黔州。十九年死。廢朝葬。以國公禮。醢其子象懷。州別駕。

賜引升別駕。開元中，象子適之爲相，疏請追復承乾。恆山王諡曰愍，移葬昭陵。象，越州都督，封郇國公。泰字惠褒，始出繼元。繡後改封越王，領揚州大都督，再授雍州牧、左武侯大將軍，領相州都督，改王。魏其人腰巨腹大，聰乘小輿至朝所，且善屬文。好招賢士，詔卽府置文學館，與司馬蘇勗等延賓客著書如古。賢王引記室蔣亞卿、工曹蕭德言、顧胤、謝偃等撰次括地志，詔蘇軾供帳，光祿給食。士有文學者，悉預而貴游子弟更相附藉。門若水然，凡四期乃成爲卷五百五十。蘇之秘閣，賜綵萬段，居第在延康坊上臨幸曲赦。長安死罪免坊人一年租，府僚以差賜帛。俄又月給料物有踰皇太子者，遂良疏諫。聖人尊嫡卑庶，謂之儲君，故用物不會與王共之。庶子不得爲比，所以塞嫌萌，杜禍源。今魏王新出閣，不宜太驟，自可在後月加歲增，惟慎擇。

師傅教以謙儉。輔成德器爲上。無何敕王入居武德殿。魏徵又言。王爲陛下愛子。欲安全之。不當使居嫌疑之地。矧武德殿在東宮之西。昔元吉居之。推時與事。無乃不可。帝悟乃止。王日思計。傾太子引駙馬柴令武。房遺愛等厚加贈遺。寄以腹心。府僚韋挺杜楚客復爲要結。朝臣津通賄賂。承乾懼其凌奪。陰遣人誣稱秦府典籤詣玄武門上封言其罪惡。帝省書怒。卽遣捕。不獲。旣而太子敗。帝陰許立秦岑文本。劉洎亦請長孫無忌。因欲立晉王。帝以太原石文有治萬古之符。將從之。秦徵知謬。謂晉王汝素善元昌。將及禍。王憂甚。帝怪問知其故。憮然而罷。會面召承乾。謹讓訴曰。臣爲太子。尚何所求。但爲秦所圖。與朝臣日謀自安。無狀之人。遂教臣爲不軌事。若使秦爲太子。正得計耳。帝悟曰。汝言是也。有如此立秦。則副君可施求而得。卽幽秦將作。

監解所領職降王東萊因下詔自今太子藩王兩相窺望者並棄之。著爲令。尋改王順陽居均州之鄖。鄉帝念之不已。語左右以秦。誠才士文辭可喜。但爲社稷計。遣使居外。兩相完爾。二十一年進王濛高宗卽位。詔開府置僚屬。車服羞膳異等。竟死于鄖。年三十五。贈太尉。雍州牧。諡曰恭。有文集二十卷。長子欣嗣。王武后時。酷吏陷貶。貽州別駕卒。子嶠。本名餘慶。神龍初。嗣王開元中。爲國子祭酒。以罪貶鄖州別駕。移鄖州卒。欣弟徽封新安郡王。

楊妃生恪。與愔。恪始封長沙郡王。進漢王。貞觀二年。又徙王蜀。爲人善騎射。有文武才。母卽煬帝女。地親望高。中外所向。帝復以恪英果類已。欲立爲嗣。無忌固爭曰。今人舉基不定。尚敗。況儲位乎。帝乃止。十年改封吳王。授安州都督。臨行。賜書勉其以

義制事以禮制心。外之爲君臣。內之爲父子。今當去膝下。不遺
汝珍。而遺汝言。其念之哉。高宗卽位。加司空。轉梁州都督。卒。以
嫌疑。因事誅之。以絕天下望。臨刑呼曰。社稷有靈。無忌且族滅。
四子仁瑋。琨。琬。並流嶺表。顯慶五年。追封鬱林王。爲立廟。以河
間王孝恭。孫榮。爲鬱林縣侯。奉祀神龍。初。贈司空。備禮。改葬。光
宅中。仁遇赦。還。令襲鬱林縣男。歷岳州別駕。進爵郡公。嘗使江
左。遺以金。不內。武后勞曰。吾家千里駒。更名千里。天授後。歷唐
廬。許。衛。蒲。五州刺史。爲人性褊躁。無他才能。特以詭譎數進。符
瑞異物。竟免於禍。長安三年。充嶺南安撫。討擊使。中宗反正。進
封成王。拜左金吾大將軍。坐節愍起兵。與其子天水王禧。斬右
延明門將殺三思。反被誅。籍改姓。復唐宗立。詔還姓及官爵。
瑋早卒。中宗追封朗陵王。琨武后時。歷滑。衛。宋。鄭。梁。幽。六州。

刺史皆有名聖曆中爲嶺南招慰使安輯反獠甚得其宜卒贈
司衛卿神龍初加張掖郡王開元中以子祿貴追封吳王琬封
歸政郡主歷宗正卿坐千里事貶南州司馬卒 棹少有志尚
事繼母謹撫弟祇友當襲封固讓中宗嘉其意特封嗣江王以
繼焉後開元時降信安郡王歷德蔡衡蜀漢五州刺史政號清
嚴人吏畏服入爲光祿卿遷將作大匠母憂服除進左金吾大
將軍朔方節度使吐蕃據石堡城詔與河西隴右議攻取旣到
敵日進師人皆憚其城險難以深入奮然曰人臣之節豈憚險
遠必期盡力以死繼之竟督諸將分兵追賊路倍道兼進遂拔
之玄宗大喜更號其城曰振武軍自是河隴諸軍遊奕拓地千
餘里十九年契丹官可突干叛殺其王邵固率部落降于突
厥詔副忠王爲河北道行軍元帥討之王實不行獨棹率裴耀

卿諸將分道出范陽北擊二藩破之禽酋長以還餘部竄伏以
功就加開府儀同三司領關內度支營田採訪處置使仍授二
子以官還擢兵部尚書坐事下除衢州刺史徙滑懷二州天寶
初以太子少師致仕薨年八十平生治家嚴毅教子有法度故
誦譽觀皆顯 祖性質厚志行修立歷官有美名天寶中爲南
宮郎歷典諸曹十餘年居父喪哀毀得禮服闋例封趙國公由
考功郎中出爲睢陽太守以清簡爲二千石最赴蜀行在除武
部侍郎兼御史大夫俄拜蜀郡太守劍南節度採訪使健兒郭
千仞夜謀亂詔與陳元禮討平之以功加金紫光祿大夫還京
遷戶部尚書改越國公乾元初拜江淮都統兼節度宣慰觀察
等使以拒劉展戰壽春敗績貶袁州司馬卒于官贈揚州大都
督贈終蜀州刺史兗州輔 祇封嗣吳王歷東平靈昌陳留三

郡太守募兵拒安祿山玄宗壯之累遷左金吾大將軍河南都知兵馬使加兼御史中丞持節河南道節度採訪使歷太僕宗正二卿大曆時爲太子賓客與勳望大臣待詔集賢院卒次子獻嗣王至宗正卿檢校刑部尚書卒贈太子少保爲人性介直而刺人短歷官清白家無留儲松屋不庇風雨收恤甥姪慈愛過人公卿合贈乃克葬 愔貞觀五年與憚等六王同封梁王授襄州刺史十年同改王蜀轉益州都督皆遙領十三年出爲岐州刺史數畋游不法以非罪毆所部縣令帝頻責教不悛乃削封戶及國官半左除虢州刺史久之還戶復出馳弋敗民稼典軍楊道整叩馬諫愔粹擊之永徽初爲御史大夫李乾祐所劾高宗怒再貶黃州刺史擢道整匡道府折衝都尉遂與恪謀逆廢爲庶人安置巴州復封治陵王薨咸亨初復爵土贈益州

大都督陪葬昭陵諡曰悼子瑤嗣王武后時謫死神龍初以明陵王棹子檢嗣開元中例降封廣漢郡王遷太僕卿卒

陰妃生祐字贊武德八年王宜陽進王楚又王燕已乃封齊領齊州都督其舅尚乘直長陰弘智儉人也嘗說王兄弟多卽上萬歲後何以自全須得勇士自助乃引妻兄燕弘亮弘信入謁祐禮接甚厚賜以金帛使益募劍客平居好弋獵溺羣小憚上所置長史司馬薛大鼎屢諫不聽上以輔王無狀免去更用權萬紀性剛急引法繩祐制其出入不得擅離國門有督君暮梁猛彪者騎射得幸萬紀斥之祐仍私與狎昵暱幸愈甚萬紀恐併得罪勸王上所愛子上欲王改悔故數賜書責讓王誠能飭躬引咎請親入朝言之上意必解祐因上書謝罪帝見萬紀嘉其盡言厚賜之而戒飭如故祐以爲賣已意愈不平萬紀收繫

君暮等於獄放逐。鴈犬遂大發怒謀殺萬紀。會事洩。詔刑部尚書劉德威臨訊。召祐還京師。祐遂發兵募城中男子。年十五以上悉爲軍。私署左右官。名有拓東王拓西王之號。斥庫貲行賞。驅人築堞浚隄。繕甲兵。人怨惡。皆夜絕亡去。卽詔德威與李勣發便道兵討之。祐日夜引弘亮等對其妃宴樂。紿言不須憂。但右手持酒。唱左手揮刃。拂之帝手救。吾常戒汝勿近小人。汝往爲吾子。今乃國讐。上慚皇天。下愧后土。趣畢涕而遣之。祐檄諸縣皆不從。勢窮。扈上表歸罪。萬紀譏之。時青淄等州不俟勅至。兵已集。兵曹杜行敏夜勒兵鑿垣入祐內。閉宮門拒至。日中行。敏令士積薪呼曰。不速降吾。且焚宮。妻子勸祐出。執送京師。貶爲庶人。賜死。葬以國公禮。詔給復齊州一年。擢行敏巴州刺史。封南陽郡公。州人羅石頭亦數祐罪。以刀直前刺祐。不克殺之。

贈亳州刺史又引騎徇邑聚野人高君狀進言祐以爲愧禽而
不殺詔擢榆杜令

宮人王氏生暉始封郟王授洺州刺史改封蔣拜安州都督永
徽三年徙梁州有司劾其前任多造器川服玩詔貸不問上元
中遷箕州刺史參軍張君微誣告暉反使者按驗惶懼自殺高
宗知其枉斬君微贈暉司空荊州大都督陪葬昭陵子煒嗣王
歷沂州刺史武后害之神龍初孫紹宗嗣薨子欽福嗣爲率更
令南郡長史 煌封蔡國公孫之芳善五言詩有令譽爲安祿
山范陽司馬及反自歸京師授右司郎中歷工部侍郎太子右
庶子廣德初詔兼御史大夫使吐蕃被留二歲歸拜禮部尚書
終太子賓客

燕妃生貞與焉貞始王漢授徐州都督後徙原尋乃封越累揚

與安州大都督相州刺史加實封至千戶爲人善騎射涉文史
有吏幹人服其才然行侵暴惑讒言醜正直武后初遷太子太
傅爲豫州刺史忤后廢帝房陵與宗室韓三等及子琅邪王沖
常山公舊議反正數奏免所部租稅以結人心率家僮千人馬
千匹托以收獵內習武備會得譔聖書卽命長史蕭德琮募兵
告諸王師期八月沖先引兵五千攻濟州貞將兵破上蔡新蔡
令傅延慶徇屬縣得士七千列五營貞居中以汝陽縣丞裴守
德爲大將軍領中營內營總管趙成美爲左中郎將領左營閻
弘道爲右中郎將領右營安摩訶爲郎將領後軍王孝志爲右
將軍領前軍又以蔡州長史韋慶禮爲司馬署官五百然皆脅
誘無鬪志諸王兵莫有應者沖乃先敗惟守德驍勇貞先妻以
女委之腹心九月后遣左豹韜大將軍趙崇裕夏官尚書岑長

借率師十萬來討鳳閣侍郎張光輔諸軍節度下詔削韓魯越
霍屬籍官爵咸改氏馮崇裕等次豫州貞命少子規及守德與
戰咸潰貞乃閉門自守守德排闥入問王安在意欲殺貞自贖
會軍薄城家僮禦之不克貞仰藥死規亦縊其母自殺守德與
妻俱縊起凡二十日而敗 冲爲人好學勇而才兼善騎射累
遷博州刺史初發有士五千渡河先取武水縣令乘城冲因風
積薪焚其門火作風反衆心逆沮其屬董玄寂因言王與國爲
敵乃反爾冲聞斬之兵皆散入葦澤不可禁止左右惟家僮數
十乃退走博州爲當關者刺死起凡七日禱亦坐死弟溫以前
告其謀流嶺南尋卒神龍初敬暉等奏冲父子死社稷請還官
爵爲三思等沮罷開元四年乃復爵土有司議以死不忘君諡
之曰敬以貞從孫故許王子夔國公琳嗣王奉祀尋卒國除開

成中有女道士名元真自言貞幼子珍謫嶺表數世不能歸節
度使盧鈞出俸資助元真持四世喪北還求耐王坐詔嘉憫敕
宗正寺聽其葬霜早天謚曰殤

韋妃生慎始王申授秦州都督改王紀貞觀十七年遷襄州刺
史以治最壘書勞勉人爲立石頌德永徽初拜左衛大將軍荆
州都督改邢州刺史文明中加太子太師轉貝州刺史自幼好
學善星步曆與越王齊名知時未可不預起兵后亦徵下獄將
就刑而免謫巴州薨于道七子續東平王歷和州刺史前卒琮
義陽王啟楚國公秀襄陽郡公獻廣化郡公欽建平郡公並皆
從謫死神龍初以證嗣王擢左驍衛將軍薨子行同嗣

楊妃生趙王福貞觀十三年出繼隱太子後累遷梁州都督薨
贈司空并州都督陪葬昭陵無子神龍初以蔣王惲孫思順嗣

王改名瑒開元中改王中山爲右領軍衛將軍

高宗八子後宮劉氏生忠字正本時方昇儲位太宗以初得孫
臨幸大悅羣臣皆從因共爲樂酒酣起舞命在位皆舞盡日而
罷資賜有差貞觀二十年封陳王永徽初領雍州牧王皇后無
子其舅柳爽勸后忠母本微立之必親已后然之爲請於帝爽
又與無忌遂良韓瑗志寧等繼請遂立爲皇太子大赦六年加
元服賜酺三日及后廢武后所生子弘已三歲許敬宗希旨建
言國有正嫡元嗣誕生宜準漢劉彊故事帝名見敬宗詭以東
宮知有正嫡漸不自安請帝裁之帝曰此非小可恐非社稷計
顯慶元年特許其讓降封梁王授梁州都督賜甲第并物二萬
段俄徙房州刺史忠年漸長心常懷懼恒恐及禍至不聊生又
數有妖夢名巫占訊事露廢爲庶人徙黔州拘於承乾故宅隣

德初敬宗又誣與上官儀王伏勝謀反賜死年二十二無子太子弘表請收葬神龍初追封燕王贈太尉揚州大都督

楊氏生上金蕭淑妃生素節永徽初封上金妃王領益州都督歷郾壽二州刺史素節雍王領雍州牧轉岐州刺史時武后疾其母被譖死有司希旨誣奏削封邑徙上金澧州安置山素節申州刺史乾封初后矯情授上金沔州刺史素節岳州刺史聽朝集卒不得入高宗崩詔俱赴哀文明元年上金徙畢王又爲澤王歷蘇陳隋三州刺史武承嗣諷周興誣二王謀反名繫御史獄自經死六子並流死嶺南惟義珣匿于庸保得免神龍初追還爵邑以義珣嗣王許王瑊謀奪爵邑告其假冒復流嶺外開元初復以瑊弟瑒爲後賴王真公主表義珣實上金子乃奪爵復還義珣拜率更令薨子懋嗣素節六歲能日誦古詩賦

五百餘言受學徐齊聘淬厲自勉帝愛之以不得入朝著忠孝論自明張柬之以聞欲帝省其誣武后滋不悅降王鄆陽削封戶什七徙錮袁州儀鳳三年更王葛又徙王許爲舒州刺史被逮赴都至龍門驛經死年四十三葬以庶人禮子瑛等九人並誅惟琳璵璆欽古尚幼長流雷州中宗追復故封贈開府儀同三司陪葬乾陵開元初封琳嗣越王至右監門衛將軍子隨封夔國公璵初嗣王實封四百戶爲衛尉卿以抑上金子貶鄂州別駕終太子詹事贈蜀郡大都督子解需皆幼以璆子益嗣天寶十四載解始襲王璆初嗣澤王降爲郢國公官光祿卿又進襲信郡王天寶初進龍池皇德頌拜宗正卿爲人性友弟聰敏宗子有一善無不延薦當時在省闈者多所啓奏堯贈江陵大都督子謙郢國公梓州刺史吳汝南郡公欽古封巴國公子

資嗣

武后生弘與賢弘性仁孝永徽六年封代王立爲皇太子大赦改元顯慶令受春秋左氏於率更令郭瑜至楚世子商臣弑其君廢書嗟曰聖人垂訓何書此耶瑜曰孔子作春秋善惡必書褒善以勸貶惡以誠故商臣之罪千萬世猶不得滅弘曰雖然所不忍聞願讀他書瑜拜曰曾子不入勝母之里殿下睿孝天縱黜凶悖之迹不存視聽臣嘗聞安上治民莫善於禮孔子稱不學禮無以立請改受禮太子曰善四年加元服特命許敬宗許圜師上官儀楊師儉卽文思殿摘采古今文章號瑤山玉彩凡五百篇書奏帝賜物三萬段餘臣賜賚有差詔五日一赴光順門決事賓禮大臣未嘗有過總章元年釋菜國學請贈顏回太子少師會有勅征遼將士背軍在逃不卽首者處死家屬沒

子又立太孫於古無有帝曰自我作古於是詔議開府置官屬
敬彝等奏置師傅友文學祭酒左右長史東西曹掾主簿管記
司錄六曹等官加王府一級然卒不補將封嵩山名太子赴東
都以太孫留守京師中宗失位太孫府廢貶爲庶人囚於別所
帝復位封邵王大足中言張易之兄弟何得恣入宮禁后怒杖
殺之年十九爲人風神俊朗早以孝友知名誅不緣罪人皆流
涕神龍初追贈皇太子諡曰懿德陪葬乾陵仍爲聘國子監丞
裴粹女爲冥婚與之合葬

後宮生重福重俊重茂重福高宗時王唐昌郡徙封平恩長安
末進王譙歷官國子祭酒左散騎常侍神龍初韋后譖以嘗陷
重潤貶濮州刺史錮置均州景龍三年南郊大赦獨不宥自陳
亦不報韋后臨朝詔左屯衛大將軍趙承恩薛思簡以兵護守

睿宗立徙集州未行洛陽人張靈均說以大王居嫡長當爲天子相王安可越居大位昔漢祿諸呂乃東迎代王今東都百官士庶皆願王來若潛行入洛陽遣人襲殺留守卽擁兵西據陝東下河北天下可圖也重福然之會鄭愔貶江州司馬便道詣重福陰相結托與靈均謀尊重福爲天子睿宗爲皇季叔重茂爲皇太弟愔自署左丞相知內外文武事靈均爲右丞相天柱大將軍知出征事其餘以次除署乃自均州詐乘驛趨東都舍駙馬裴巽家洛陽令候巽重福驚遁出欲劫左右屯營兵至天津橋願從者數百人侍御史李邕遇之先馳至右屯營呼曰譙王得罪先帝擅入都爲亂公等勉立功取富貴次諭皇城諸門悉閉以拒重福無所往縱火焚左掖門左營兵寢逼衆遂潰重福走山谷留守裴談縱兵大索投泔渠死年三十一磔其屍帝

詔以三品禮葬。重俊聖曆三年王義興授衛尉卿神龍初收
王衛領洛州牧尋遷左衛大將軍領揚州大都督明年立爲皇
太子以太后喪殺冊禮爲人性明果然少法度無賢師傅開導
俄以駙馬楊瓌武崇訓爲賓客並馮貴寵寡學術惟狗馬蹴鞠
戲昵而已左庶子姚珽數上疏諫諍右庶子平貞慎獻孝經義
養德等傳皆納而不川武三思挾后勢將圖逆內忌太子其子
崇訓妻安樂公主又以重俊非后出數嘗爲奴請廢之自爲皇
太女重俊悲忿三年七月率李多祚泊將軍李思沖李承況獨
孤碑之沙叱忠義等矯發左羽林及千騎兵三百餘人殺三思
崇訓于其第并其黨十餘人使成王千里分兵守宮城自率兵
趨肅章門斬關入索韋后安樂公主上官昭容所在后挾帝升
玄武門宰相楊再思蘇瓌李嶠及宗楚客紀處訥統二千餘兵

守太極殿。帝召右羽林將軍劉仁景等率飛騎百人拒之。多祚兵不得進。帝據檻語千騎曰。爾乃朕爪牙。反爲亂耶。能斬賊者予官。於是千騎王歡喜等倒戈斬多祚等。餘黨悉潰。重俊亡入終南山。欲奔突厥。楚客遣果毅趙思慎追至鄠縣。左右乘其野宿殺之。梟首朝堂。獻于太廟。并以告三思。崇訓。樞。膺宗立。加諡節愍。陪葬定陵。初被害時。官屬莫敢視。惟永和丞。嘉坊號哭解衣裹其首。時人義之。楚客怒。收付獄。貶平興丞。卒贈永和令。景雲三年。封重俊子宗暉。湖陽郡王。天寶中。歷衛尉。鴻臚。太常三卿。重茂聖曆三年。封北海郡王。神龍初。進王。溫授右衛大將軍。領并州大都督。韋后立爲帝。而自臨朝稱制。后敗。遜位睿。睿退居別所。景雲二年。改封襄王。遷于集州。用兵守衛。開元二年。轉房州刺史。薨。年十七。諡曰殤。皇帝葬武功西原。

肅宗六子肅明皇后生憲始封永平郡王文明元年立爲皇太子肅宗避位更爲皇孫開府置官屬長壽二年降王壽春中宗立改王蔡唐隆元年進封宋肅宗以憲嫡長將建爲東宮辭曰儲副天下公器時平則先嫡長國難則先有功臣授非宜海內失望臣敢以死辭因涕泣再表固讓乃授太子太師雍州牧兼揚州大都督賜甲第物段良馬奴婢上田俄進尚書右僕射兼司徒復讓改太子賓客時太平公主密圖非望姚元崇宋璟白帝出憲及申王皆爲刺史銷釋陰計乃以兼蒲州刺史先天初進司空玄宗定內難授右衛大將軍進太尉復辭改開府儀同三司開元中歷岐澤涇等州刺史徙王寧兼太常卿先是東都積善坊列第號五王宅及賜第上都隆慶坊亦號五王宅玄宗友愛出於天性爲太子時製大衾長枕將與諸王共之肅宗

知喜甚。先天後改。隆慶舊邸爲興慶宮。別賜憲及薛王第於勝業坊中。岐二王居安興坊。環列宮側。宮西南置樓。署其西曰花萼。相輝之樓。南曰勤政。務本之樓。每諸王朝。帝卽登臨。名與同。榻燕坐。樂聲不絕。或便幸其第。賦詩嬉謔。賜以金帛。有歡縱。飲擊毬。鬪雞馳犬。歲月不絕。當代雍睦。誠謂罕比。雖有譏邪。幸無以搖憲。復謹畏。未嘗干政。故兩相信重。時有鴿。鴿千數。集麟德殿庭樹。翔棲浹日。左清道率府長史魏光乘作頌。以爲天子友。悌之祥。帝喜。繼亦爲之。又嘗以書賜憲等曰。魏文帝詩。每言鳳藥而求羽翼。朕謂罕如兄弟。天生之羽翼乎。陳思王才足以經國。乃絕其朝謁。卒使憂死。魏祥亦不終。神丸竟何效耶。朕今不然。願與兄弟偕至長齡。永永無極。後中王等相繼薨。惟憲在。帝親待益厚。每生日必幸其第。往往留宿。尚方食無日不遺。及

四方所獻名酒異饌。歲終錄賜。付史館。數百紙。尚未盡。有疾。護醫將膳相望。僧崇一療之。少損。帝喜甚。賜緋袍銀魚。薨。年六十三。帝失聲號慟。以王推讓天下。有高世之行。非大義不稱。乃追諡讓皇帝。遣左丞相裴耀卿太常卿韋縉持節奉冊。子璿表陳不敢當。不許。及斂。山天子服一稱。置靈坐。追贈妃元氏爲恭皇后。葬橋陵旁。號曰惠陵。敕璿等送終之具。皆令衆見。示以儉薄。使知謙讓之美。所司請如諸陵。設干味食。內壙中監護。使耀卿亦請。獨省詔。可。發引日。大雨。詔慶王澤以下步送十里。憲常從帝按舞萬歲樓上。從複道見衛士棄餘食。竇中怒。詔高力士杖殺之。憲從容曰。從複道上窺人私。恐士不自安。且失大體。豈以性命輕於餘殽乎。帝遽止。涼州獻新曲。帝御便殿。召諸王觀之。憲曰。曲雖佳。然宮離而不屬。商亂而暴。君卑過下。臣僭犯上。

發於忽微形於音聲播之詠歌見於人事臣恐一日有播遷之禍帝默然及安史亂世乃思王審音云初名成器避胎成諡與申王等俱改今名子十長璉嗣王眉宇秀整性謹潔善射帝愛之初封汝陽郡王歷太僕卿加特進與賀知章褚庭誨梁涉等善薨贈太子太師莊幼有令名爲太子左諭德封濟陰郡王薨贈幽州大都督琳以秘書監爲嗣寧王從幸蜀薨瑀早有材望偉儀觀始封隴西郡公從幸蜀至河池封漢中王山南西道防禦使乾元初寧國公主降回紇瑀以特進太常卿持節冊拜回紇爲威遠可汗亦能知音嘗早朝過永興里聞太常樂工笛音謂曰何故臥吹笛工驚謝又聞康崑崙琵琶以爲琵琶聲多琵琶少是未可彈蓋樂家以自下逆鼓曰琵琶自上順鼓曰琵琶肅宗詔收羣臣馬助戰瑀與魏少游等持不可帝怒貶蓬州

長史薨贈太子太師諡曰宣 玠蒼梧郡公 璠晉昌郡公
瑄魏郡公 瑄文安郡公 孫景儉字寬中太子中舍褚子爲
人彊記多聞善言古成敗王霸大略高自抱負不屈權勢人比
管葛及第以母喪不與王叔文之亂辟韋夏卿東都幕府中丞
竇羣引爲監察御史隨羣貶江陵戶曹參軍擢忠州刺史元和
末改澧州元稹李紳薦其才穆宗進爲倉部員外郎閏月拜諫
議大夫性矜誕使氣詬侵宰相蕭俛段文昌貶建州刺史稱復
還舊職又辟爲宰相王播崔植杜元穎貶漳州移楚州改少府
監漣鬱不得志卒然爲人輕財爲義既沒士悵悼之弟景儒景
信景仁皆有藝學登進士知名於時

宮人柳氏生搗本名成義初生時武后以母賤欲不齒以示浮
屠萬迴施爲西土大樹之精養之宜兄弟后喜乃畜之垂拱三

年始王恆隨例改王衡陽累授尚衣奉御司農少卿睿宗立進
王申歷右衛金吾二大將軍殿中監轉光祿卿先天初進司徒
兼益州大都督歷幽鄆魏絳四州刺史爲人性寬裕儀貌瓌重
薨贈太子諡曰惠莊陪葬橋陵無嗣詔以讓帝子珣嗣爲懷寧
王徙封同安爲人修身淳謹不自矜貴閭門穆如薨贈太子太
保無子復以弟璿嗣王

崔孺人生範始名隆範避玄宗名與薛王同省初王鄭改封衛
隨例降封巴陵授尚食奉御太府少卿睿宗立進王岐任太常
卿并州大都督左羽林大將軍從玄宗誅太平公主加賜實封
歷鄭絳岐三州刺史遷太子太傅爲人好學工書雅愛儒士無
貴賤爲盡禮與閭朝隱劉廷琦張諤鄭絳等善常飲酒賦詩相
娛樂先是隋亡禁內圖書湮放唐興募訪復出悉藏祕府長安

初張易之奏請裴漢密訪善工使摹肖殆不可辨反竊其真藏于家既誅悉爲薛稷取去稷又敗範乃得之故範所聚書畫皆世所無者後亦爲火所焚駙馬裴虛已善識繪坐私與範游徙嶺南延琦貶雅州司戶謬爲山莊丞然帝與範無少間也時王毛仲等暴起貴顯諸王見者必加禮獨範接之自如開元十四年薨卽贈太子諡曰惠文陪葬橋陵帝哭之慟徹常膳至累旬子璵嗣落魄不飭名檢沈于酒色歷太僕卿封河東王薨贈太子少師天寶中復以薛王子略陽公珍爲嗣珍儀觀豐偉爲宗正卿與蔚州鎮將朱融善融嘗言貌似上皇因有密謀往語金吾將軍邢濟曰關外寇近京師奈何濟曰我天子押衙以死生從安能自脫融曰有一人足下見之自當知縱不出城亦無慮乃引以見珍濟奏之肅宗廢爲庶人安置蔡州賜死連坐寶如

珍崔昌處斬駙馬楊洞薛履謙賜自盡貶張鎬辰州司戶爲桂
管防禦使

王德妃生業始王趙降封中山授都水使者徙彭城兼陳州別
駕進王薛爲羽林大將軍荊州都督又因好學授祕書監開元
初進太子少保至太保歷同涇陽衛號五州刺史生時母早終
鞠于從母賢妃乃迎事外邸甚謹女弟淮陽涼國二主亦早卒
撫甥與已子均帝益愛之嘗被疾帝自視禱旣愈幸其第置酒
賦詩爲歡帝嘗不豫王妃弟內直郎韋賓與殿中監皇甫恂妄
言休咎賓坐死恂貶錦州刺史王與妃降服待罪不敢入謁帝
聞遽召之王伏殿下請罪帝趨執其手曰吾所猜于兄弟者天
地共咎之遂復歡燕仍諭妃復位俄進司徒二十二年王有疾
帝憂之一夕容髮爲變及薨悲不能食冊封太子諡曰惠宣陪

葬橋陵十一子其間者瑗樂安王瑒樂陽王宗正卿瑁嗣薛王
歷鴻臚卿帝後追思王引兄瑗等傷之乃下詔共賜實封千戶
天寶中李林甫構瑁舅韋堅貶襄陵別駕徙置夜郎南浦祿山
亂後乃還京師曾孫知柔嗣王再爲宗正卿擢京兆尹調三
輔開鄭白渠復舊道淮浸如初遂省旱虞民詣闕請立石紀功
累加檢校司徒同中書門下平章事又詔營繕太廟判度支充
諸道鹽鐵轉運使昭宗出莎城獨知柔從乘輿器用庖頓皆主
之大細畢給爲人性儉約雖位通顯無居第未幾出拜清海軍
節度使在鎮廉潔貢獻時入進檢校太傅兼侍中仕凡四紀常
爲宗室冠卒于鎮

玄宗三十子劉華妃生琮琬琤琮本名嗣直景雲元年王許昌
郡先天元年進王郊開元四年領安西大都護仍充安撫河東

關內隴右諸蕃大使十三年徙王慶更名潭十五年領涼州都督兼河西諸軍節度大使又加太子太師拜司徒天寶元年兼太原牧薨贈諡靖德太子肅宗追尊奉天皇帝妃竇氏恭應皇后詔僕射裴冕持節收葬羣臣素服臨送達禮門帝御門哭以過喪墓號齊陵無子以瑛子休嗣 琬初名嗣玄更名湜始王邺徙王榮爲京兆牧兼隴右節度大使詔親巡按隴右還關內河東飛騎五萬防秋累兼單于安北大都督祿山反詔爲征討元帥募河隴兵屯陝副以高仙芝爲人風格秀整有素望中外倚之及薨莫不恨恨贈諡靖恭太子生男女五十八得王者三脩王濟陰郡偕北平信陳留原衛尉卿債秘書監佩鴻臚卿璵初名濰開元十七年封儀王授河南牧薨贈太傅子旼王鍾陵郡健廣陵 趙麗妃生瑛初名嗣謙更名鴻始王真定進王

鄧開元三年立爲皇太子七年詔與諸王入國學行齒冑禮擇
日釋奠孔子。褚無量執經講畢。賜帛羣臣學官諸生各有差。明
年加元服。見太廟。十六年詔納太常少卿薛紹女爲妃。與諸王
侍帝種麥苑中。帝曰。是將薦宗廟。故親之。亦欲若等知稼穡之
難。因分賜侍臣曰。春秋書無麥禾。古所甚重。此詔使者問田畝
所對。不以實。故朕自蒔以觀其成功。其鄂光二王乃皇甫德儀
劉才人所生。後以武惠妃專寵。生壽王。愛超諸子。太子二王頗
怏怏。惠妃女咸宜公主駙馬楊洄乘樂伺太子短詐。爲醜語。惠
妃泣訴于帝。帝大怒。召宰相議廢之。張九齡諫曰。太子諸王。日
受聖訓。天下共慶。陛下享國長久。子孫蕃衍。奈何一旦欲廢三
子。帝默然。得寢。俄而九齡罷。李林甫數稱壽王美。以探帝意。妃
德之。二十五年洄復構三人與薛妃兄鏞爲異謀。惠妃乃稱宮

中有賊詭召之請介而入太子從之妃白帝以爲謀反帝使中人出視果中違召林甫議答以陛下家事非臣所宜豫帝意決乃下詔太子及鄂光二王同惡均罪廢爲庶人尋皆遇害賜鋪死天下冤之寶應元年贈瑛皇太子瑤琚皆復王瑛子五人儼仲倚休備被廢時帝使慶王育之儼封新平仲平原皆郡王休嗣慶王備太僕卿倩失傳瑤始名嗣初更名洵封鄂王遙領幽州都督河北節度大使開府儀同三司琚初名琚開元十三年封光王俄領廣州都督爲人有勇力善騎射居常友睦篤于問學無嗣

錢妃生琰初名嗣真更名洽開元二年始王節後徙王棣領太原牧太原以北諸軍節度大使俄加太子太保天保初轉武威郡都督經略節度河西隴右妃韋紹女以過置別室嬖二孺人

復爭寵不平求巫者密置符琰履中以求媚仇人告琰厭魅帝伺其朝使人取履果得符帝怒令推驗果三人所爲事已白帝猶疑琰拘之鷹坊太子以下皆爲請卒以憂死妃無子還本宗琰凡五十五子得王者四俱汝南僑立都俊濟南俊順化皆郡王僚太僕卿依國子祭酒仁殿中監優秘書監寶應元年詔復琰王爵

武惠妃四子一未免懷薨追封夏王諡曰悼敏貌豐秀若畫甫辟薨追爵懷王諡曰思 瑁初名清以母頻姬不育養于寧王邸元妃自乳之名爲已子故封比諸王最後開元十三年與親同日封壽王以母方有寵故鍾愛之七歲與諸兄同謁帝拜舞有儀帝異之十五年遙領益州大都督寧王薨特許制服以報私恩李林甫屢請立爲太子以妃薨不果大曆十年王薨贈太

傳子優德陽休濟陽偃廣陽皆郡王伉薛國公傑國子祭酒
琦初名沐開元十五年封盛王領揚州大都督帝西幸詔節度
江南東路及淮南河南兵馬兼採訪使不行乃以李成式爲副
大使亮贈太傅子償王真定佩王武都俗徐國公係許國公
高婕妤生穎王璪初名湜喜讀書好文辭開元十五年與璿同
日領安東都護平盧軍節度大使祿山反詔領劔南節度大使
副以楊國忠誅後更以蜀郡長史崔圓移書劔南屬郡大設儲
儲時因倉遽不及受節司馬史賁請建大梁蒙油囊先驅以威
道路至成都圓迎拜馬前璪不爲禮銜之凡視事再踰月人便
其寬玄宗至聞奏罷之移居內宅俄會宣慰肅宗於彭原從還
京師建中四年薨年六十六子仲爲榮陽王儋高邑王偁楚國
公儋夔國公

郭順儀生永王璘初名澤母乃劔南節度尚書盧已之妹早喪
肅宗自養視之長聰敏好學貌陋甚目邪視不正始遙領荊州
大都督玄宗駕至扶風詔卽日赴鎮俄又領山南江西嶺南黔
中四道節度使副以少府監寶昭少長宮闕不閑外事至江陵
募士得數萬補署郎官御史見江淮租賦鉅億充積既富且彊
遂有闕江左意任薛鏐李臺卿韋子春劉巨鱗蔡駟爲謀主其
子襲城王陽剛鷙有勇樂於倡亂勸璘取金陵卽引舟師東下
以渾惟明李廣琛高仙舟爲將率甲士五千竟趨廣陵會吳郡
採訪使李希言平牒璘璘因發怒曰寡人上皇子皇帝弟地尊
禮絕今希言乃平牒抗威落筆署字何物敢爾卽使惟明襲之
又令廣琛攻採訪使李成式璘至當塗降希言將元景曜殺丹
陽太守圓敬之江淮震動肅宗遣宦者啖廷瑤與成式謀招諭

之成式遣判官裴茂引廣陵步卒三千屯伊婁塢大張旗幟輝耀江津璘與傷登陴望之有懼色會有旨降璘庶人徙置房陵諸將相與謀曰我等從王豈欲反耶正以上皇播遷道路不通諸王子無賢於王者如總江淮銳兵長驅雍洛大功可成今乃不然使我等名絳叛逆如後世何遂割臂反盟是日惟明奔江寧馮季康奔白沙廣琛兵六千亦遁璘使騎追之還語曰我德王故不忍決戰今逃命歸國若逼我且決死追者乃止璘所結河北招討判官李銑陣江北夜然束葦人執二炬璘疑江北軍已濟攜兒女及麾下將奔晉陵謀者告王已走成式遂進先鋒趙侃庫狄岫趙連城至新豐璘使傷仙琦逆擊銑合勢張左右翼射傷中肩軍遂敗仙琦與璘奔鄱陽司馬陶備閉城璘怒焚城門以入收其庫兵掠餘千將走嶺表江西採訪皇甫旆兵追

及之戰大庾嶺璘中矢被執仇殺之傷爲亂兵所害仙琦逃去
仇送妻子至蜀上皇傷悼久之帝以少所自鞠不宜其罪誅薛
縡等怒仇擅殺不復進用子伋後封餘姚王伋莒國公偃郕國
公伶儀並國子祭酒

柳婕妤生延王玢初名洄母左丞範之孫帝重其名家而玢亦
仁愛有學遙領安西大都護殲西節度大使加開府儀同三司
入蜀時以男女三十六人不忍棄故徐進數日見帝行在聽歸
靈武興元元年薨子倬彭城僉平陽皆郡王倬魯國偃荆國皆
公伋太僕卿

豐王珙母陳才人初名澄爲左衛大將軍帝至普安授珙武威
都督河西隴右安西北庭節度大使不行副以隴西太守鄧景
山會吐蕃入京師代宗幸陝將軍王懷忠閉苑門以五百騎劫

諸王西迎蕃道遇郭子儀懷忠告曰上東遷宗社無主今僕奉
諸王西奔以係天下望公爲元帥宜有所廢置子儀未對珙輒
曰公何不語司馬王延昌貴珙曰上雖蒙塵未有失德王爲藩
翰安得狂悖之言子儀亦讓之卽護送行在所帝赦不責珙語
不遜羣臣恐其亂請除之乃賜死涼王璿汴哀王璿母武賢
妃高平王重規之女宮中號小武妃璿初名澁薨代宗時子伋
爲瀘陽郡王璿初名滔最少封時纔數歲容貌秀澈有成人
風帝愛之開元二十三年授右千牛衛大將軍明年薨

肅宗十三子鄆王榮名王伋宋王僖皆天宮人孫氏生係本名
僖開元末始王南陽郡至德二載進王趙乾元二年九節度兵
潰河北朝廷震駭李光弼請賢王爲帥詔係充天下兵馬元帥
實留京師以光弼副知節度行營事史思明陷洛陽係請行不

聰明年徙王越帝寢疾張皇后將誅李輔國詔太子入謀泣請
二人皆上動舊恐有震驚后以爲難與共事乃詔係係許諾卽
遣內謁者段恆俊選才勇宦者二百人授甲長生殿程元振知
之以告輔國謀與勒兵凌宵門迎太子誣以欲廢太子立越王
夜入三殿收係及恆俊等百餘人繫之內庭皆被害三子建武
咸適典道皆郡王逾齊國公

官人張氏生建寧王倓英毅有才略善騎射祿山亂典親兵尾
車駕渡渭百姓遮道留太子倓進說曰逆賊亂常四海崩分不
因人情以圖興復縱能從上入蜀散關以東非國家有夫大孝
莫若安社稷殿下當募豪傑趣河西收牧馬今防邊屯士不下
十萬而光弼子餒全軍在河朔與謀興復策之上者太子納之
時士氣崩沮兵仗不完太子既北上日數十戰餒以驍騎數百

從常身先鋒刃血殷袂不敢告太子或過時未食俟輒涕泣流離顛沛所不能堪三軍屬目者皆歸心及卽位議以爲天下兵馬元帥羣臣固請廣平王帝曰廣平冢嗣又安用帥對曰廣平有君人之量今用爲元帥正合古者太子從曰撫軍守曰監國之義帝以爲然張后時爲良娣恃寵自恣與輔國內外結構爲奸倖性忠審數爲帝言二人知之交譖倖恨失兵權鬱鬱有異志會上皇在蜀賜后七寶鞍倖請分賜有功將士以爲得衆心帝惑偏語遂賜倖死俄帝悔悟明年與李泌從容語及倖事帝愴然曰倖性忠孝爲細人間閥欲害其兄朕爲社稷計割愛忍爲之泌曰爾時臣在河西知其詳廣平於兄弟敦睦至今言建寧嗚咽不自已陛下所言出於護口也帝泣下曰事已如此爲之奈何後代宗卽位追贈倖齊王又欲追帝問於李泌答曰開

元中上皇兄弟皆贈太子帝曰是特祖宗之愛耳豈若倏當艱難時首定大謀力排衆議於中興有功乎大曆三年加諡號承天皇帝冥配興信公主季女張氏冊爲恭順皇后葬順陵祔主奉天皇帝廟同殿興室遣使迎喪彭原既至城門喪輿不動帝亟謂泌曰豈尚有遺恨耶卿往祭以白厭意泌爲挽詞二解追述倏志命挽士唱之泌因進酌輿乃行觀者皆爲垂泣

宮人王氏生衛王佖早薨韋妃生苑王儼張美人生涇王佺段婕妤生杞王倓陳婕妤生彭王儼始王新城郡授鴻臚卿至德二載諸王同進封時史思明陷河洛人心震騷羣臣請以諸王統方鎮兵遙相維扈於是詔僅河西側北庭倓隴右倓陝西倓鳳翔並充節度大使是歲僅薨子鎮爲常山郡王儼初封潁川郡授太子詹事母卽堅妹爲林甫構廢實應初薨倓初封東陽

郡授光祿卿興元初薨

裴貽儀生襄王儼貞元七年薨子宣伊吾家樂安皆郡王光啓二年田令孜逼僖宗幸興元邠寧朱玫起乘輿不及時宜春孫愬以疾不能從玫脅宰相蕭遘等率羣臣盟石鼻驛奉愬爲嗣襄王監軍國事引還京師封拜官屬遘執不可罷之玫自爲侍中專號令以裴澈爲門下侍郎鄭昌圖中書侍郎並同平章事遣柳陟等十餘人分行天下告嗣襄王監國之意方鎮皆進官玫又脅太子太師裴璩等奉牋勸進愬五讓乃卽位改元建貞尊僖宗爲太上元皇聖帝河中節度使王重榮率諸藩貢奉歸者十之八九泰宗權自僭大號惟李克用不從遣使諭之始聽命樞密使楊復恭等傳檄三輔募能斬玫者以邠寧節度畀之僞將王行瑜自鳳州入京師殺玫愬乃與澈昌圖并官屬奔東

渭橋重築假遣使來迎至蒲執殺之併械激等于獄誅殺僞官
函燼首至行在所燼卽僞位凡九月敗詔廢爲庶人解屬籍葬
以庶人禮

張皇后生佑與侗佑始封興王侗定王后方專寵故帝尤鍾愛
后數憾太子欲以佑嗣李泌前天后時太子賢作黃臺瓜辭云
一摘使瓜好再摘使瓜稀今建寧已被摘可再摘乎上元初佑
薨侗又孩幼計乃塞帝及后嘗夢佑流涕是年七月間贈佑皇
太子謚曰恭懿葬長安高陽原令京兆尹劉晏監護其事寶應
初侗亦薨

代宗二十子崔妃生鄭王邕自幼好讀書以儒行聞上元二年
始王益昌寶應元年進封時淄青牙將李懷玉逐其帥侯希逸
詔邕爲平盧淄青節度大使以懷玉知留後大曆初代皇太子

爲天下兵馬元帥明年薨帝惜其才早天問贈太子諡昭靖葬
萬年縣界遂罷元帥府 獨孤后生韓王趙次均王遐睦王述
丹王逾恩王連簡王邁益王廼隋王旦荆王邁蜀王廸忻王造
韶王趙嘉王運端王遇循王趙恭王通原王趙雅王逸史皆不
著姓氏所出又相繼天逝事亦不備大曆十年日承嗣不臣大
臣建議分領戎帥以威天下於是以述領嶺南逾領渭北鄆坊
趙領汴宋造領昭義皆爲節度大使俱遙授不出閭述於諸王
最長建中初詔天下遍訪德宗母沈太后所在乃以爲奉迎使
貞元七年薨

德宗十一子多夭折乃取弟鄭王邕之子謨爲子於諸王最長
自幼帝愛之大曆十四年與通虔二王同封奇王俱拜開府儀
同三司建中元年帝欲試以事命領四鎮北庭行軍涇原節度

大使以涇州刺史孟準主留後事時郭子儀病篤帝臨軒遣使持詔往視李希烈反招討李勉不勝奔宋州朝廷大震又拜漢揚州大都督荆襄江西沔鄂節度諸軍行營兵馬都元帥改名誼未及行涇原兵反從幸奉天朱泚攻城誼晝夜傳勞諸軍不解帶還京復故封永貞元年薨又取順宗子諱爲子見愛於帝貞元初先封邕王歷義武昭義二軍節度大使以張茂昭王虔休爲留後不出閤十五年薨年十八追冊文敬太子葬日羣臣以位哭通化門外陵及廟置令丞通王譔貞元九年領宣武節度大使以李萬榮爲留後二年徙河東以李說爲留後皆不出閤虔王諒貞元二年領蔡州節度大使以吳少誠爲留後十年徙節朔方靈鹽以李樂爲留後明年領橫海又徙徐州以程懷信張愔爲留後不出閤肅王諱天資秀異帝愛之薨

甫四歲帝欲用浮屠說塔而不墳禮官李岌諫非禮乃止贈揚州大都督

順宗二十三子事多缺張昭儀生鄭王經本名渙貞元四年始王建康郡二十一年進封太和八年薨年二十九均王緯初名沔王洋川開成二年薨年三十三潋王縱初名洵王臨淮開成元年薨年三十二莒王紆初名浼爲秘書監王弘農太和八年薨年二十九

趙昭儀生宋王結初名滋王雲安長慶二年薨年十八集王緡初名淮王宣城長慶二年薨年十八冀王絳初名潯爲太常卿王德陽太和九年薨年三十和王紆初名沔王河東太和七年薨年二十八衡王絢寶曆二年薨年二十二莊憲皇后生福王綰歷魏博節度大使咸通元年進拜司空咸通二

年薨年五十七 撫王紘咸通初歷司空又進司徒太尉乾符三年薨年七十三 王昭儀生岳王緄太和二年薨年二十三 袁王綽咸通元年薨年五十六 翼王綽咸通三年薨年五十八

憲宗二十子紀美人生長子寧貞元二十一年與同安彭城高密文安同封平原郡王卽位與澄深洋絳同封鄧王李絳等言陛下受命已四年而冢子未建非所以承列聖示萬世帝乃問寧爲皇太子冬十月行禮明年薨年十九諡曰惠昭用期服以日易月廢朝十三日 僖第二初名寬始王同安郡進王灊惠昭喪吐突承璀有寵議復立儲屬意於僖帝自立穆宗帝崩之夕承璀死王被殺秘不發喪久之以告廢朝三日三子漢王東陽郡源安陸郡演臨安郡 宗初名察始王彭城郡進王深二

子渾王河內郡叔吳興郡

忻初名襄始王高密郡進王洋太

和二年薨子沛王穎川郡

悟初名察始王文安郡進王絳敬

宗崩蘇佐明等矯詔以王領軍國事王守澄等立文宗王見殺

子洙王新安郡沙高平郡

恪初名審元和元年封建王領鄆

州大都督平盧淄青節度大使以李師道爲留後不出閤長慶

元年薨無嗣

郾王憬長慶元年始王開成四年薨子溥王平

陽郡

瓊王忱子津河間郡王

沔王恂子瀛晉陵郡王

王懌子清新平郡王

茂王愔子惠武功郡王

湓王協開成

元年薨子澣許昌郡王煥馮翊郡王

衡王憺子涉晉平郡王

澶王悅子潭雁門郡王

棟王儒大中六年始王咸通三年

薨與信王愐彭王協皆無嗣

榮王愐咸通三年始王廣明初

拜司空子令平嗣王

穆宗五子三立爲帝第六子湊少溫雅寬和及長齊莊有度中
外屬望長慶元年始封漳王文宗疾王守澄頗狠撓國謀誅之
密引宰相宋申錫使爲計鄭注伺知以告守澄反謀先殺申錫
又忌王賢明令神策虞候豆盧革上飛變言宮史晏徽則朱朝
與申錫吏王師文圖不軌云上多疾太子幼若兄終弟及必漳
王立申錫陰以金幣進王而王亦以珍服厚答卽捕繫神策獄
榜掠定其辭諫官伏閤極言得付外雜泊注等懼事洩請下詔
貶王帝未之悟黜爲巢縣公時太和五年也命中人持詔慰以
國法當爾無他憂八年薨贈齊王注伏誅帝始悟其讒死不自
明開成三年追贈太子諡懷懿 楊賢妃生洛初封安王授開
府儀同三司妃得寵於文宗晚多疾陰請王爲嗣以爲自安地
帝與宰相李珣謀謂不可乃止及帝崩仇士良立武宗欲重已

功撻洛舊事殺之餘皆貶官

敬宗五子妃郭氏生普姿性超悟謹愿無過失寶曆元年封晉王
文宗愛之若已子欲立爲嗣太和二年薨帝惻念不已贈太子諡曰悼懷開成二年又封次子休復梁王執中襄王言揚紀王成美陳王文宗以非格薨大臣數請建東宮開成四年乃立成美爲皇太子典冊未具而帝崩仇士良立武宗殺之於邸子儼王宣城郡

文宗二子王德妃生永太和四年封魯王上以王年幼宜得賢輔因召見其傅和元亮乃由卒史進目不知書伏地無言帝責宰相魯王質性可教應選賢士爲官屬於是擇戶部侍郎庾敬休兼王傅太常卿鄭肅兼長史戶部郎中李踐方兼司馬六年十月間爲皇太子詔宮臣詣崇明門朝朔望以王起陳夷行爲

侍讀偶曰入對太子稍事燕豫昵近小人不循法度母又愛馳
楊賢妃方幸數譖之帝震怒御延英引見羣臣曰太子多過失
不可屬天下其議廢之羣臣頓首言太子春秋盛雖有過尚可
改且天下本不可輕動惟陛下幸赦御史中丞狄兼基流涕固
爭帝未決羣臣又連章論救意稍釋詔太子還少陽院以中人
護視誅倖昵數十人敕侍讀竇宗直周敬復詣院授經太子終
不能改又無由白其譏於是年暴薨帝悔之會置酒殿中有俳
兒緣梯父畏其顛環走梯下帝感動謝左右曰朕不天下反不
能全一兒乎因泣下立名短毀太子者劉楚才等數人付京兆
撈殺之斃禁中女倡十人于永巷加謚曰莊恪

武宗五子事皆不著杞王峻開成五年封益王峴兗王岐德王
暉昌王瑑俱會昌二年同封

宣宗十一子長靖懷太子漢會昌六年始王雍大中六年薨詔追冊次雅王涇通王滋慶王沂濮王澤鄂王潤懷王洽昭王汭康王汝廣王濉衛王瀼初詔居十六宅餘處大明宮內院以諫議大夫鄭漳兵部郎中李鄴爲侍讀五日一謁乾符門爲王授經昭宗乾寧三年領侍衛諸軍時李茂貞怨朝廷誅王行瑜以兵入覲詔滋與諸王分統安聖捧宸保寧安化軍衛京師天子將狩太原韓建道迎之留次華州建畏王等有兵遣人上急變告諸王欲殺建脅帝幸河中帝驚召滋與睦濟韶彭韓沂陳入王謁建自解後三日建與劉季述矯以兵併延王戒丕丹王允及覃王共十一僞尊引其屬至石隄谷盡殺之以反聞天下冤之

懿宗八子魏王佖涼王佖蜀王佖王偁吉王保皆不詳始終

惟睦王倚爲劉季述所殺天復初追贈哀恭太子

僖宗二子建王震益王陞中和并光啓間封不詳所終

昭宗十七子長德王裕積善何后所生大順二年帝幸華州韓
建奪諸王兵內不自安乃請封之旣又殺諸王因請立裕爲皇
太子釋言於四方其次棣王栩虔王榘沂王禪遂王禕景王祕
祁王祗雅王禎瓊王祥豐王祈和王福登王禧嘉王祐頴王禕
劉季述等幽帝東內奉裕卽皇帝位季述誅裕匿右軍帝以其
冲孺賊彊立之詔還少陽院復爲王朱全忠自鳳翔還見王春
秋盛標宇軒秀忌之密語崔胤王旣竊帝大義滅親尚可復留
公任宰相盡啓之胤從容言帝不許他日帝以語全忠疑胤賣
已對曰此國大事臣安敢與乃免久之帝謂蔣玄暉德王朕愛
子全忠奈何欲殺之全忠悲怒令玄暉置酒邀諸王九曲池飲

刑皆殺之投屍水中